

Udakashaanti Mantra

॥ उदकशान्ति मन्त्राः ॥

ॐ

ब्रह्मजज्ञानं प्रथमं पुरस्तात् विसीमितस्सुरुचो वेन आवः ।
सबुध्निया उपमास्यविष्ठः सतश्च योनिमसत्स्विवः ॥

आपो वा इदं सर्वं विश्वा भूतान्यापः प्राणा वा आपः
पशव आपोऽन्नमापोऽमृतमापः सम्राडापो विराडापः
स्वराडापश्छन्दास्यापो ज्योतीष्यापो
यजूष्यापस्सत्यमापस्सर्वा देवता आपो
भूर्भुवस्सुवराप ओम् ॥

अपः प्रणयति । श्रद्धावा आपः ।
श्रद्धा म् एवारभ्य प्रणीय प्रचरति
अपः प्रणयति । यज्ञो वै आपः ।
यज्ञ म् एवारभ्य प्रणीय प्रचरति
अपः प्रणयति । वज्रो वै आपः ।
वज्रमेव भ्रातृव्येभ्यः प्रहृत्य प्रणीय प्रचरति ।
अपः प्रणयति । आपो वै रक्षोघ्नीः ।
रक्षसां अपहत्यै ।
अपः प्रणयति । आपो वै देवानां प्रियंधाम ।
देवानामिव प्रियंधाम प्रणीय प्रचरति ।
अपः प्रणयति । आपो वै सर्वा देवताः ।
देवता एवारभ्य प्रणीय प्रचरति ।
आपोवैशान्ताः । शान्ताभिरैवास्य शुचं शमयति ॥

देवो वस्सविता उत्पुनातु । अच्छिद्रेण पवित्रेण । वसोः सूर्यस्य रश्मिभिः ।
स हि रत्नानि दाशुषै सुवाति सविता भगः । तं भागं चित्रमीमहे ॥

ॐ

अग्निमीळे पुरोहितं यज्ञस्य देवमृत्विजम् । होतारं रत्नधातमम् ॥
इषेत्वोर्जे त्वा वायवस्थोपायवस्थ देवो वः सविता प्रार्पयतु श्रेष्ठतमाय कर्मणि ॥
अग्न आयाहि वीतये गृणानो हव्यदातये । निहोता सत्सि बर्हिषि ॥

शन्नो देवीरभिष्टय आपो भवन्तु पीतये । शंयोरभिस्रवन्तु नः ॥

कृणुष्व पाजः प्रसितिन्न पृथ्वीं याहि राजेवामवा इमेन ।
तृष्वीमनु प्रसितिं दूणानोऽस्ताऽसि विध्य रक्षसस्तपिष्ठैः ॥
तव भ्रमास आशुया पतन्त्यनु स्पृश धृषता शोशुचानः ।
तपूष्यग्ने जुह्व पतङ्गानसन्दितो वि सृज विश्वगुल्काः ॥
प्रति स्पशो वि सृज तृणितमो भवा पायुर्विशो अस्या अदब्धः ।
यो नो दूरे अघशसो यो अन्त्यग्ने माकिष्ट व्यथिरादधर्षीत् ॥
उदग्ने तिष्ठ प्रत्याऽऽतनुष्व न्यमित्रा ओषतात् तिग्महेते ।
यो नो अरातिः समिधान चक्रे नीचा तं धक्ष्यतसं न शुष्कम् ॥
ऊर्ध्वो भव प्रति विध्याध्यस्मदाविष्कृणुष्व दैव्या न्यग्ने ।
अव स्थिरा तनुहि यातुजूनो जामिमजामिम् प्र मृणीहि शत्रून् ॥
स ते जानाति सुमतिम् यविष्ठ य ईवते ब्रह्मणे गातुमैरत् ।
विश्वान्यस्मै सुदिनानि रायो दुम्नान्यर्यो वि दुरो अभि द्यौत् ॥
सेदग्ने अस्तु सुभगस्सुदानुर्यस्त्वा नित्येन हविषा य उक्थैः ।
पिप्रीषति स्व आयुषि दुरोणे विश्वेदस्मै सुदिना सासदिष्टिः ॥
अर्चामि ते सुमतिम् घोष्यर्वाक् सन्ते वावाता जरतामियं गीः ।
स्वश्वास्त्वा सुरथा मर्जये मास्मे क्षत्राणि धारयेरनु दून् ॥
इह त्वा भूर्या चरे दुपत्मन्दोषावस्तदी दिवाः समनु दून् ।
क्रीडन्तस्त्वा सुमनसस्सपेमाभि दुम्ना तस्थिवाः सो जनानाम् ॥
यस्त्वा स्वश्चस्सु हिरण्यो अग्न उपयाति वसुमता रथेन ।
तस्य त्राता भवसि तस्य सखा यस्त आतिथ्यमानुषग् जुजोषत् ॥
महो रुजामि बन्धुता वचोभिस्तन्मा पितुर्गोतमादन्वियाय ।
त्वन्नो अस्य वचसश्चिकिद्धि होतर्यविष्ठ सुकृतो दमूनाः ॥
अस्वप्नजस्तरणयस्सुशेवा अतन्द्रासोऽवृका अश्रमिष्ठाः ।
ते पायवस्सध्रियञ्चो निषद्याऽग्ने तव नः पान्त्वमूर ॥
ये पायवो मामतेयन्ते अग्ने पश्यन्तो अन्धन्दुरितादरक्षन् ।
ररक्ष तान्तसुकृतो विश्ववेदा दिप्सन्त इद्रिपवो नाह देभुः ॥
त्वया वयः सधिन्यस्त्वोतास्तव प्रणीत्याश्याम् वाजान् ।
उभा शसा सूदय सत्यतातेऽनुष्ठुया कृणुह्य ह्याण ॥
अया ते अग्ने समिधा विधेम प्रति स्तोमः शस्यमानं गृभाय ।
दहाशसो रक्षसः पाह्यस्मान्द्रुहो निदो मित्रमहो अवद्यात् ॥
रक्षोहणं वाजिनमाऽऽजिधर्मि मित्रम् प्रथिष्ठमुपयामि शर्म ।
शिशानो अग्निः क्रतुभिस्समिद्धस्स नो दिवा स रिषः पातु नक्तम् ॥
विज्योतिषा बृहता भान्त्यग्निराविर्विश्वानि कृणुते महित्वा ।
प्रादेवीर्मायास्सहते दुरेवाः शिशीते शृङ्गे रक्षसे विनिक्षे ॥

उत स्वानासो दिविषन्त्वनेस्तिग्मायुधा रक्षसे हन्त वा उ ।

[मदे चिदस्य प्ररुजन्ति भामा न वरन्ते परिबाधो अदेवीः ॥]

(The line in [] is usually not chanted for auspicious occasions and is included for completeness.)

इन्द्रो वो विश्वतस्पेरि हवामहे जनेभ्यः । अस्माकमस्तु केवलः ।
इन्द्रन्नरो नेमधिता हवन्ते यत्पार्या युनजते धियस्ताः ।
शूरो नृषाता शवसश्चकान आ गोमति ब्रजे भजा त्वन्नः ।
इन्द्रियाणि शतक्रतो या ते जनेषु पञ्चसु । इन्द्र तानि त आ वृणे ।
अनु ते दायि मह इन्द्रियाय सत्रा ते विश्वमनु वृत्रहत्यै ।
अनु क्षत्रमनु सहो यजत्रेन्द्र देवेभिरनु ते नृषह्यै ।
आ यस्मिन्त्सप्त वासवास्तिष्ठन्ति स्वारुहो यथा ।
ऋषिर्ह दीर्घश्रुत्तम इन्द्रस्य घर्मो अतिथिः ।
आमासु पक्वमैरय आसूर्यः रोहयो दिवि ।
घर्मन्न सामन्तपता सुवृक्तिभिर्जुष्टम् गिर्वणसे गिरः ।
इन्द्रमिद्गाथिनो बृहदिन्द्रमर्केभिरर्किणः । इन्द्रं वाणीरनूषत ।
गायन्ति त्वा गायत्रिणोऽर्चन्त्यर्कमर्किणः ।
ब्रह्माणस्त्वा शतक्रतुवुद्धं शमिव येमिरे ।
अहोमुचे प्र भरेमा मनीषा मोषिष्ठदाब्ने सुमतिं गृणानाः ।
इदमिन्द्र प्रति हव्यं गृभाय सत्याः सन्तु यजमानस्य कामाः ।
विवेष यन्मा धिषणा जजान स्तवै पुरा पार्यादिन्द्रमहः ।
अहसो यत्र पीपरद्यथा नो नवेव यान्तमुभये हवन्ते ।
प्र सम्राजम् प्रथममध्वरणाम् हो मुचं वृषभं यज्ञियानाम् ।
अपान्नपातमश्विना हयन्तमस्मिन्नर इन्द्रियं धत्तमोजः ।
वि न इन्द्र मृधो जहि नीचा यच्छ पृतन्यतः ।
अधस्पदन्तमीम् कृधि यो अस्माः अभिदासति ।
इन्द्र क्षत्रमभि वाममोजोऽजायथा वृषाभ चर्षणीनाम् ।
अपानुदो जनममित्र यन्तमुरुं देवेभ्यो अकृणोरु लोकम् ।
मृगो न भीमः कुचरो गिरिष्ठाः परावतः आ जगामा परस्याः ।
सुकं सशाय पविमिन्द्र तिग्मं विशत्रून् ताढि विमधो नुदस्व ।
वि शत्रून् वि मृधो नुद वि वृत्रस्य हनू रुज ।
विमन्युमिन्द्र भामितोऽमित्रस्याभिदासतः ।
त्रातारमिन्द्रमवितारमिन्द्रं हवे हवे सुहवः शूरमिन्द्रम् ।
हुवे नु शक्रं पुरुहूतमिन्द्रं स्वस्ति नो मघवा धात्विन्द्रः ।
मा ते अस्याः सहसावन् परिष्ठावधाय भूम हरिवः परादै ।
त्रायस्व नोऽवृकेभिर्वरुथैस्तव प्रियासस्सुरिषु स्याम ।

अनवस्ते रथमश्वाय तक्षन् त्वष्टा वज्रं पुरुहूत द्युमन्तम् ।
 ब्रह्माण इन्द्रं महयन्तो अर्कैरवर्धयन्नहये हन्त वा उ ।
 वृष्णे यत् ते वृषणो अर्कमर्चानिन्द्रं ग्रावाणो अदितिस्सजोषाः ।
 अनश्वासो ये पवयोऽरथा इन्द्रेषिता अभ्यवर्तन्त दस्यून् ।

यत् इन्द्रं भयामहे ततो नो अभयं कृधि ।
 मघवन्च्छृगिध तव तन्न ऊतये विद्विषो विमृधो जहि ।
 स्वस्तिदा विशस्पतिर्वृत्रहा विमृधो वृशी ।
 वृषेन्द्रः पुर एतु नः स्वस्तिदा अभयंकरः ।
 महा इन्द्रो वज्रबाहुः षोडशी शर्म यच्छतु ।
 स्वस्ति नो मघवा करोतु हन्तु पाप्मानं योऽस्मान् द्वेष्टि ।
 सजोषा इन्द्रं सगणो मरुद्भिस्सोमं म् पिब वृत्रहञ्छर विद्वान् ।
 जहि शत्रुरपमृधोनुदस्वाअथाभयं कृणु हि विश्वतो नः ।

ये देवाः पुरस्सदोऽग्नि नैत्रा रक्षोहणस्तेनः पान्तु
 ते नोऽवन्तु तेभ्यो नमस्तेभ्यः सवाहा
 ये देवा दक्षिणसदो यमनैत्रा रक्षोहणस्तेनः पान्तु
 ते नोऽवन्तु तेभ्यो नमस्तेभ्यः सवाहा
 ये देवा पश्चात् सदसवितृ नैत्रा रक्षोहणस्तेनः पान्तु
 ते नोऽवन्तु तेभ्यो नमस्तेभ्यः सवाहा
 ये देवा उत्तरसदो वरुणनेत्रा रक्षोहणस्तेनः पान्तु
 ते नोऽवन्तु तेभ्यो नमस्तेभ्यः सवाहा
 ये देवा उपरिषदो बृहस्पतिनेत्रा रक्षोहणस्तेनः पान्तु
 ते नोऽवन्तु तेभ्यो नमस्तेभ्यः सवाहाऽग्नये रक्षोघ्ने स्वाहा यमाय रक्षोघ्ने स्वाहा
 सवित्रे रक्षोघ्ने स्वाहा वरुणाय रक्षोघ्ने स्वाहा बृहस्पतये दुवस्पते रक्षोघ्ने स्वाहा ।

अग्निरायुष्मान्त्स वनस्पतिभिरायुष्मान्तेन त्वाऽऽयुषाऽऽयुष्मन्त म् करोमि ।
 सोम आयुष्मान्त्स ओषधीभिरायुष्मान्तेन त्वाऽऽयुषाऽऽयुष्मन्त म् करोमि ।
 यज्ञ आयुष्मान्त्स दक्षिणाभिरायुष्मान्तेन त्वाऽऽयुषाऽऽयुष्मन्त म् करोमि ।
 ब्रह्मायुष्मत्तद् ब्राह्मणैरायुष्मन्तेन त्वाऽऽयुषाऽऽयुष्मन्त म् करोमि ।
 देवा आयुष्मन्तस्तेऽमृतेनायुष्मन्तस्तेन त्वाऽऽयुषाऽऽयुष्मन्त म् करोमि ।

या वामिन्द्रा वरुणा यतव्या तनूस्तयेममं हंसो मुंचत म् ।
 या वामिन्द्रा वरुणा सहस्या तनूस्तयेममं हंसो मुंचत म् ।
 या वामिन्द्रा वरुणा रक्षस्या तनूस्तयेममं हंसो मुंचत म् ।
 या वामिन्द्रा वरुणा तेजस्या तनूस्तयेममं हंसो मुंचत म् ।

यो वामिन्द्रा वरुणावग्नौ सामस्तं वामितेनाव' यजे
 यो वामिन्द्रा वरुणा द्विपात्सु पशुषु सामस्तं वामितेनाव' यजे
 यो वामिन्द्रा वरुणा चतुष्पत्सु पशुषु सामस्तं वामितेनाव' यजे
 यो वामिन्द्रा वरुणा गोष्ठे सामस्तं वामितेनाव' यजे
 यो वामिन्द्रा वरुणा गृहेषु सामस्तं वामितेनाव' यजे
 यो वामिन्द्रा वरुणाप्सु सामस्तं वामितेनाव' यजे
 यो वामिन्द्रा वरुणौषधीषु सामस्तं वामितेनाव' यजे
 यो वामिन्द्रा वरुणा वनस्पतिषु सामस्तं वामितेनाव' यजे ॥

अग्नेयशस्विन्यशसे ममपयेन्द्रावतीमपचितीमिहावह ।
 अयं म् मूर्धा परमेष्ठी सुवचास्समानानामुत्तमश्लोको अस्तु ॥
 भद्रं म् पश्यन्त उपसेदुरग्रे तपो दीक्षामृषयः सुवर्चिदः ।
 ततः क्षत्रं म् बलमोजश्च जातं तदस्मै देवा अभि सन्नमन्तु ॥
 धाता विधात परमोतसंधृक् प्रजापतिः परमेष्ठी विराजा ।
 स्तोमाश्छंदांसि निविदोम आहुरेतस्मै राष्ट्रमभिसन्नमाम ॥
 अभ्यावर्तध्वमुपमेतसाक मयः शास्ताऽधिपतिर्वो अस्तु ।
 अस्य विज्ञानमनुसंरभध्वमिमं म् पश्चादनु जीवाथ सर्वैः ॥
 ॥ राष्ट्रभृतं ॥

ऋताषाडृतधामाग्निर्गन्धर्वस्स इदं म् ब्रह्मक्षत्रं म् पातु तस्मै स्वाहा ।
 तस्यौषधयोऽप्सरस ऊर्जा नाम ता इदं म् ब्रह्मक्षत्रं म् पातु ताभ्यः स्वाहा ।
 संहितो विश्वसामा सूर्यो गन्धर्वः स इदं म् ब्रह्मक्षत्रं म् पातु तस्मै स्वाहा ।
 तस्य मरीचयोऽप्सरस आयुवो नाम ता इदं म् ब्रह्मक्षत्रं म् पातु ताभ्यः स्वाहा ।
 सुष्मनः सूर्यरश्मिश्चन्द्रमा गन्धर्वः स इदं म् ब्रह्मक्षत्रं म् पातु तस्मै स्वाहा ।
 तस्य नक्षत्राण्यऽप्सरसो बेकुरयो नाम ता इदं म् ब्रह्मक्षत्रं म् पातु ताभ्यः स्वाहा ।
 भुज्युस्सुपर्णो यज्ञो गन्धर्वः स इदं म् ब्रह्मक्षत्रं म् पातु तस्मै स्वाहा ।
 तस्य दक्षिणा अप्सरसस्तवा नाम ता इदं म् ब्रह्मक्षत्रं म् पातु ताभ्यः स्वाहा ।
 प्रजापतिर्विश्वकर्मा मनो गन्धर्वः स इदं म् ब्रह्मक्षत्रं म् पातु तस्मै स्वाहा ।
 तस्यक्सामान्यप्सरसो वह्नयो नाम ता इदं म् ब्रह्मक्षत्रं म् पातु ताभ्यः स्वाहा ।
 इषिरो विश्वव्यचा वातो गन्धर्वः स इदं म् ब्रह्मक्षत्रं म् पातु तस्मै स्वाहा ।
 तस्यापोऽप्सरसो मुदा नाम ता इदं म् ब्रह्मक्षत्रं म् पातु ताभ्यः स्वाहा ।

भुवनस्य पते यस्य त उपरि गृहा इह च ।
 सनोरास्वाज्यानिः रायस्पोषाः सुवीर्यः संवत्सरीणाः स्वस्तिः स्वाहा ।

परमेष्ठयधिपतिर्मृत्युर्गन्धर्वः स इदं म् ब्रह्मक्षत्रं म् पातु तस्मै स्वाहा ।

तस्य विश्वमप्सरसो भुवो नाम ता इदम् ब्रह्मक्षत्रम् पान्तु ताभ्यः स्वाहा ।
 सुक्षितिस्सुभूतिर्भद्रकृत्सुवर्वाङ्गर्जन्यो गन्धर्वः स इदम् ब्रह्मक्षत्रम् पातु तस्मै स्वाहा ।
 तस्य विद्युतोऽप्सरसो रुचो नाम ता इदम् ब्रह्मक्षत्रम् पान्तु ताभ्यः स्वाहा ।
 दूरे हेतिरमृडयो मृत्युर्गन्धर्वः स इदम् ब्रह्मक्षत्रम् पातु तस्मै स्वाहा ।
 तस्य प्रजा अप्सरसो भीरवो नाम ता इदम् ब्रह्मक्षत्रम् पान्तु ताभ्यः स्वाहा ।
 चारुः कृपणकाशी कामो गन्धर्वः स इदम् ब्रह्मक्षत्रम् पातु तस्मै स्वाहा ।
 तस्याधयोऽप्सरसश्शोचयतीनाम् ता इदम् ब्रह्मक्षत्रम् पान्तु ताभ्यः स्वाहा ।

सनो भुवनस्य पते यस्य त उपरि गृहा इह च ।
 उरुब्रह्मणिस्मै क्षत्राय महि शर्म यच्छ स्वाहा ॥

नमो अस्तु सर्पेभ्यो ये के च पृथिवीमनु ।
 ये अन्तरिक्षे ये दिवि तेभ्यः सर्पेभ्यो नमः ॥
 येऽदो रोचने दिवो ये वा सूर्यस्य रश्मिषु ।
 येषामप्सु सदः कृमं तेभ्यः सर्पेभ्यो नमः ॥
 या इषवो यातुधानानां ये वा वनस्पतीरनु ।
 ये वाऽवटेषु शरते तेभ्यः सर्पेभ्यो नमः ॥
 ॥ पंचचोडाः ॥

अयंपुरो हरिकेशः सूर्यरश्मिस्तस्य रथगृत्सश्च रथौजाश्च सेनानिग्रामण्यौ
 पुञ्जिकस्थला च कृतस्थला चाप्सरसरसौ यातुधाना हेति रक्षसि प्रहेतिस्तेभ्यो
 नमस्ते नो मृडयन्तु ते यम् द्विष्मो यश्च नो द्वेष्टि तम् वो जम्भे दधामि ।

अयं दक्षिणा विश्वकर्मा तस्य रथस्वनश्च रथे चित्रश्च सेनानिग्रामण्यौ
 मेनका च सहजन्या चाप्सरसरसौ
 दङ्क्षणवः पशवो हेति पौरुषयोवधः प्रहेतिस्तेभ्यो
 नमस्ते नो मृडयन्तु ते यम् द्विष्मो यश्च नो द्वेष्टि तम् वो जम्भे दधामि ।

अयं पञ्चाद्विश्वव्यासास्तस्य रथप्रोतश्चासमरथश्च सेनानिग्रामण्यौ
 प्रम्लोचन्ती चानुम्लोचन्ती चाप्सरसरसौ सर्पा हेतिर्व्याघ्राः प्रहेतिस्तेभ्यो
 नमस्ते नो मृडयन्तु ते यम् द्विष्मो यश्च नो द्वेष्टि तम् वो जम्भे दधामि ।

अयमुत्तरात्संयद्वसुस्तस्य सेनजिच्च सुषेणश्च सेनानिग्रामण्यौ
 विश्वाची च घृताची चाप्सरसावापो हेतिर्वातः प्रहेतिस्तेभ्यो
 नमस्ते नो मृडयन्तु ते यम् द्विष्मो यश्च नो द्वेष्टि तम् वो जम्भे दधामि ।

अयमुपर्यागवसुस्तस्य ताक्ष्यश्चारिष्टनेमिश्च सेनानिग्रामण्यावुर्वशी

पूर्वचित्तिश्चाप्सरसरसौ विद्युद्धितरवस्फूर्जन्प्रहेतित्स्तेभ्यो
 नमस्ते नो मृडयन्तु ते यम् द्विष्मो रश्च नो द्वेष्टि तम् वो जम्भे दधामि ।
 ॥ अप्रतिरथम् ॥
 आशुः शिशानो वृषभो न युध्मो घनाघनः क्षोभणश्चर्षणीनाम् ।
 संक्रन्दनोऽनिमिष एकवीरः शतं सेना अजयत्साकामिन्द्रः ॥
 संक्रन्दनानिमिषेण जिष्णुना युत्कारेण दुश्च्यवनेन धृष्णुना ।
 तदिन्द्रेण जयत् तत् सहध्वं युधो नर इषुहस्तेन वृष्णा ॥
 स इषुहस्तैः स निषङ्गिभिर्वशी सस्रष्टा स युधु इन्द्रो गणेन ।
 सस्रष्टजित् सोमपा बाहुशुच्यूर्ध्वधन्वा प्रतिहिताभिरस्ता ॥
 बृहस्पते परि दीयारथेन रक्षोहाऽमित्रा अपबाधमानः ।
 प्रभञ्जन्त्सेनाः प्रमृणो युधा जयन्नस्माकमिध्यविता रथानाम् ॥
 गोत्रभिदं गोविदं वज्रबाहुं जयन्तमज्म प्रमृणन्तमोजसा ।
 इमं सजाता अनु वीरयध्वमिन्द्रं सखायोऽनु स रभध्वम् ॥
 बलविज्ञायः स्थविरः प्रवीरः सहस्वान् वाजी सहमान अग्रः ।
 अभिवीरो अभिसत्वा सहोजा जैत्रमिन्द्र रथमा तिष्ठ गोवित् ॥
 अभिगोत्राणि सहसा गाहमानोऽदायो वीरश्शतमन्युरिन्द्रः ।
 दुश्च्यवनः पृतनाषाडयुद्धयोऽस्माकं सेना अवतु प्र युत्सु ॥
 इन्द्र आसां नेता बृहस्पतिर्दक्षिन्णा यज्ञः पुर एतु सोमः ।
 देवसेनानामभिभञ्जतीनाम् जयन्तीनाम् मरुतो यन्त्वग्रे ॥
 इन्द्रस्य वृष्णो वरुणस्य राज्ञ आदित्यानाम् मरुतां शर्धं अग्रम् ।
 महामनसां भुवनच्यवानाम् घोषो देवानाम् जयतामुदस्थात् ॥
 अस्माकमिन्द्रः समृतेषु ध्वजेष्वस्माकम् या इषवस्ता जयन्तु ।
 अस्माकम् वीरा उत्तरे भवन्त्वस्मानु देवा अवता हवेषु ॥
 उद्धर्षय मघवन्नायुधान्युत् सत्वनां मामकानाम् महासि ।
 उद् वृत्रहन् वाजिनां वाजिनान्युद्रथानां जयतामेतु घोषः ॥
 उप प्रेत जयता नरः स्थिरा वस्सन्तु बाहवः ।
 इन्द्रो वशर्मं यच्छत्वनाधृष्या यथाऽसथ ॥
 अवसृष्टा परा पत शरव्ये ब्रह्मसंशिता ।
 गच्छामित्रान् प्रविश मैषाम् कं चनोच्छिषः ॥
 ममाणि ते वर्मभिश्छादयामि सोमस्त्वा राजाऽमृतेनाभिऽवस्ताम् ।
 उरोर्वरीयो वरिवस्ते अस्तु जयन्तं त्वामनु मदन्तु देवाः ॥
 यत्र बाणाः सम्पतन्ति कुमारा विशिखा इव ।
 इन्द्रो नस्तत्र वृत्रहा विश्वाहा शर्मं यच्छतु ॥

शं च मे मयश्च मे प्रियं च मेऽनुकामश्च मे
 कामश्च मे सौमनसश्च मे भद्रं च मे श्रेयश्च मे

वस्यश्च मे यशश्च मे भगश्च मे द्रविणं च मे
यन्ता च मे धर्ता च मे क्षेमश्च मे धृतिश्च मे
विश्वं च मे महश्च मे संविच्च मे ज्ञात्रं च मे
सूश्च मे प्रसूश्च मे सीरं च मे लयश्च
म ऋतं च मेऽमृतं च मेऽयक्ष्मं च मेऽनामयच्च मे
जीवातुश्च मे दीर्घायुत्वं च मेऽनमित्रं च मेऽभयं च मे
सुगं च मे शयनं च मे सूषा च मे सुदिनं च मे ॥

॥ विहव्यम् ॥

ममाग्ने वचो विह्वेष्वस्तु वयं त्वेन्धानास्तनुवाम् पुषेम ।
मह्यं नमन्ताम् प्रदिशश्चतस्रस्त्वयाऽध्यक्षेण पृतना जयेम ॥
मम देवा विह्वे सन्तु सर्व इन्द्रावन्तो मरुतो विष्णुरग्निः ।
ममान्तरिक्षमुरु गोपमस्तु मह्यं वातः पवताम् कामे अस्मिन् ॥
मयि देवा द्रविणमा यजन्ताम् मय्याशीरस्तु मयि देवहूतिः ।
दैव्या होतारा वनिषन्त पूर्वेऽरिष्टास्स्याम तनुवा सुवीराः ॥
मह्यं यजन्तु मम यानि हव्याऽऽकृतिः सत्या मनसो मे अस्तु ।
एनो मा नि गां कतमच्चनाहं विश्वे देवासो अधि वोचता मे ॥
देवीर्षडुर्वीरुरुणः कृणोत विश्वे देवास इह वीरयध्वम् ।
मा हास्महि प्रजया मा तनूभिर्मा रधाम द्विषते सोम रजन् ॥
अग्निर्मन्युम् प्रतिनुदन् पुरस्ताददब्धो गोपाः परिपाहि नस्त्वम् ।
प्रत्यञ्चो यन्तु निगुतः पुनस्तेऽमेषां चित्तम् प्रबुधा विनेशत् ॥
धाता धातुणां भुवनस्य यस्पतिर्देवः सवितारमभिमातिषाहम् ।
इमम् यजग्नमश्विनोभा बृहस्पतिर्देवाः पान्तु यजमानन्नयथात् ॥
उरुव्यचो नो महिषश्शर्म यः सदस्मिन् हवे पुरुहूतः पुरुक्षु ।
स नः प्रजायै हर्यश्च मृडयेन्द्र मा नो रीरिषो मा परा दाः ॥
येनस्सपत्ना अप ते भवन्तिवन्द्राग्निभ्यामव बाधामहे तान् ।
वसवो रुद्रा आदित्या उपरिस्पृशाम् मोघं चेत्तारमधिराजमक्रन् ॥
अर्वाञ्चमिन्द्रममुतो हवामहे यो गोजिद्धनजिदश्चजिद्यः ।
इमं नो यज्ञं विह्वे जुषस्वास्य कुर्मो हरिवो मेदिनं त्वा ॥

॥ मृगारम् ॥

अग्नेर्मन्वे प्रथमस्य प्रचेतसो याम् पाञ्चजन्यम् बहवस्समिन्धते ।
विश्वस्यां विशि प्रविशिशिवाः समीमहे स नो मुञ्चत्व हंसः ॥
यस्येदम् प्राणन्निमिषद्यदेजति यस्य जातम् जनमानं च केवलम् ।
स्तौम्यग्निं नाथितो जोहवीमि सनो मुञ्चत्व हंसः ॥
इन्द्रस्य मन्ये प्रथमस्य प्रचेतसो वृत्रघ्नः स्तोमा उप मासुपागुः ।
यो दाशुषः सुकृतो हवमुप गन्ता स नो मुञ्चत्व हंसः ॥
यः संग्रामम् नयति संवशी युधे यः पुष्टानि सःसृजति त्रयाणि ।

स्तौमीन्द्रं नाथितो जोहवीमि स नो मुञ्चत्वः हंसः ॥
 मन्वे वा म् मित्रावरुणा तस्य वित्तं सत्यौजसा दृंहणा यद्भुदेथे ।
 या राजानं सरथं याथ उग्रा ता नो मुञ्चतमागसः ॥
 यो वा रथं ऋजुरग्निमः सत्यधर्मा मिथुश्चरन्तमुपयाति दूष्यन् ।
 स्तौमि मित्रावरुणा नाथितो जोहवीमि तौ नो मुञ्चतमागसः ।
 वायोस्सवितुर्विदधानि मन्महे यावात्मन्वद्विभृतो यौ च रक्षतः ।
 यौ विश्वस्य परिभू बभूवतुस्तौ नो मुञ्चतमागसः ॥
 उपश्रेष्ठा न आशिषो देवयोर्धर्मे अस्थिरन् ।
 स्तौमि वायुं सवितारं नाथितो जोहवीमि तौ नो मुञ्चतमागसः ॥
 रथीतमौ रथीनामह्व ऊतये शुभं गमिष्ठौ सुयमेभिरश्वैः ।
 ययोर्वा देवौ देवेष्वनिशितमोजस्तौ नो मुञ्चतमागसः ॥
 यदयातं वहतुं सूर्यायास्त्रिचक्रेण सः सदा मच्छमानौ ।
 स्तौमि देवावश्विनौ नाथितो जोहवीमि तौ नो मुञ्चतमागसः ॥
 मरुता म् मन्वे अधि नो ब्रुवन्तु प्रेमां वाचं विश्वामवन्तु विश्वे ।
 आशून्हुवे सुयमानूतये ते नो मुञ्चत्वेनसः ॥
 तिममायुधं वीडितं सहस्वद्विव्यं शर्दः पृतनासु जिष्णु ।
 स्तौमि देवान्मरुतो नाथितो जोहवीमि ते नो मुञ्चत्वेनसः ॥
 देवाना म् मन्वे अधि नो ब्रुवन्तु प्रेमा म् वाचं विश्वामवन्तु विश्वे ।
 आशून् हुवे सुयमानूतये ते नो मुञ्चत्वेनसः ॥
 यदिद म् माऽभिषोचति पौरुषेयेण दैव्येन ।
 स्तौमि विश्वान्देवान्नाथितो जोहवीमि ते नो मुञ्चत्वेनसः ॥
 अनुनोऽद्यानुमतिर्यज्ञं देवेषु म् अन्यताम् ।
 अग्निश्च हव्यवाहनो भवतांदाशुषे मयः ॥
 अन्विदनुमते त्व म् मन्यासि शं च नः कृधि ।
 ऋत्वे दक्षाय नो हि नु प्रण आयूषि तारिषः ॥
 वैश्वानरो न ऊत्याऽऽप्र यातु परावतः । अग्निस्त्वथेन वाहसा ॥
 पृष्टो दिवि पृष्टो अग्निः पृथिव्या म् पृष्टो विश्वा ओषदीराविवेश ।
 वैश्वानरसहसा पृष्टो अग्निस्सनो दिवा सारिषः पातु नक्तम् ॥
 ये अप्रथेताममितेभिरोजोभिये प्रतिष्ठे अभवता म् वसूनाम् ।
 स्तौमि द्यावापृथिवी नाथितो जोहवीमि ते नो मुञ्चतमः हंसः ॥
 उर्वी रोदसी वरिवः कृणोत म् क्षेत्रस्य पत्नी अधि नो ब्रूयतम् ।
 स्तौमि द्यावापृथिवी नाथितो जोहवीमि ते नो मुञ्चतमः हंसः ॥
 यत् ते वय म् पुरुषत्रा यविष्ठायविष्ठा विद्वांसश्चकृमा कच्चनाऽऽगः ।
 कृधी स्वस्मा अदितेरनागा व्येनासि शिश्रथो विश्वगग्ने ॥
 यथाह तद्वसवो गौर्यं चित् पदिषिताममुञ्चता यजत्राः ।
 एवा त्वमस्मत् प्र मुञ्चाव्यः हः प्रातार्थगने प्रतरान्न आयुः ॥

॥ सर्पाहुतीः ॥

समीची नामासि प्राचीदिक्तस्यास्तेऽग्निरधिपतिरसितो रक्षिता
यश्चादिपतिर्यश्च गोप्ता ताभ्यां नमस्तौ नो मृडयतां
ते यं द्विष्मो यश्च नो द्वेष्टि तं वा जम्भे दधामि ।
ओजस्विनी नामासि दक्षिणा दिक्तस्यास्त इन्द्रोऽधिपतिः पृदाकू रक्षिता
यश्चादिपतिर्यश्च गोप्ता ताभ्यां नमस्तौ नो मृडयतां
ते यं द्विष्मो यश्च नो द्वेष्टि तं वा जम्भे दधामि ।
प्राची नामासि प्रतीची दिक्तस्यास्ते सोमोऽधिपतिः स्वजो रक्षिता
यश्चादिपतिर्यश्च गोप्ता ताभ्यां नमस्तौ नो मृडयतां
ते यं द्विष्मो यश्च नो द्वेष्टि तं वा जम्भे दधामि ।
अवस्थावा नामास्युदीची दिक्तस्यास्ते वरुणोऽधिपतिस्तरश्च राजी रक्षिता
यश्चादिपतिर्यश्च गोप्ता ताभ्यां नमस्तौ नो मृडयतां
ते यं द्विष्मो यश्च नो द्वेष्टि तं वा जम्भे दधामि ।
अधिपत्नी नामासि बृहती दिक्तस्यास्ते बृहस्पतिरधिपतिः श्वित्रो रक्षिता
यश्चादिपतिर्यश्च गोप्ता ताभ्यां नमस्तौ नो मृडयतां
ते यं द्विष्मो यश्च नो द्वेष्टि तं वा जम्भे दधामि ।
वशिनी नामासीयं दिक्तस्यास्ते यमोऽधिपतिः कल्माषग्रीवो रक्षिता
यश्चादिपतिर्यश्च गोप्ता ताभ्यां नमस्तौ नो मृडयतां
ते यं द्विष्मो यश्च नो द्वेष्टि तं वा जम्भे दधामि ॥

॥ गन्धर्वाहुतीः ॥

हेतयो नामस्थ तेषां वः पुरो गृहा अग्निर्व इषवः सलिलो
वातनाम तेभ्यो वो नमस्तेनो मृडयत
ते यं द्विष्मो यश्च नो द्वेष्टि तं वा जम्भे दधामि ।
निलिम्पा नामस्थ तेषां वः दक्षिणा गृहा पितरो व इषवः सगरो
वातनाम तेभ्यो वो नमस्तेनो मृडयत
ते यं द्विष्मो यश्च नो द्वेष्टि तं वा जम्भे दधामि ।
वज्रिणो नामस्थ तेषां वः पश्चाद्गृहा स्वप्नो व इषवो गह्वरो
वातनाम तेभ्यो वो नमस्तेनो मृडयत
ते यं द्विष्मो यश्च नो द्वेष्टि तं वा जम्भे दधामि ।
अवस्थावानो नामस्थ तेषां वः उत्तरगृहा आपो व इषवः समुद्रो
वातनाम तेभ्यो वो नमस्तेनो मृडयत
ते यं द्विष्मो यश्च नो द्वेष्टि तं वा जम्भे दधामि ।
अधिपतयो नामस्थ तेषां वः उपरि गृहा वर्षं वा इषवोऽवस्वान्
वातनाम तेभ्यो वो नमस्तेनो मृडयत
ते यं द्विष्मो यश्च नो द्वेष्टि तं वा जम्भे दधामि ।
ऋव्या नामस्थ तेषां वः इह गृहा अन्नं वा इषवोऽनिमिषो

वा॒तना॒म॒ म् तेभ्यो॑ वो॒ नम॑स्तेनो॑ मृ॒डय॑त
ते य॒ म् द्वि॒ष्मो यश्च॑ नो॒ द्वेष्टि॑ त॒ म् वो॒ ज॒म्भे॑ दधमि ।

॥ अ॒ज्यानि॑ ॥

श॒तायु॑धाय॒ शत॑वी॒र्याय॑ श॒तोत॑येऽभि॒माति॑षाहे॑ ।
श॒तं यो नः॑ श॒रदो॑ अ॒जीता॑निन्द्रो॑ ने॒षदति॑ दुरि॒तानि॑ वि॒श्वाम् ॥
ये च॒त्वारः॑ प॒थयो॑ दे॒व्याना॑ अ॒न्तरा॑ द्यावा॒पृथि॒वी वि॒यन्ति॑ ।
तेषा॑म् यो अ॒ज्यानि॑ म॒जीति॑ मा॒हवा॑त्तस्मै॑ नो दे॒वाः परि॑दत्तेह॒ सर्वे॑ ॥
ग्री॒ष्मो हे॑मन्त॒ उत॑नो॒ वस॑न्तः श॒रद्व॑र्षाः सु॒वित॑त्रो॒ अस्तु॑ ।
तेषा॑मृ॒तनाः॑ श॒तशरि॑दानां॒ निवा॑त ए॒षाम॑भये॒ स्याम॑ ॥
इ॒दुव॑त्स॒राय॑ परि॒वत्स॑राय॒ संव॑त्स॒राय॑ कृ॒णुता॑ बृ॒हन्न॑मः ।
तेषा॑ व॒यः सु॑म॒तौ य॒ज्ञिया॑ना॒ म् ज्यो॑ग॒जीता॑ अ॒हताः॑ स्याम ॥
भ॒द्रान्नः॑ श्रेयः॒ सम॑नैष्ट दे॒वास्त्वया॑ऽव॒सेन॑ सम॒शीम॑हि॒ त्वा ।
स नो॑ म॒योभूः॑ पि॒तो आ॒विश॑स्व॒ शन्तो॑काय॒ तनु॑वे॒ स्यो नः॑ ॥

भू॒त॒ म् भव्य॑ म् भ॒विष्य॑द्व॒षद॑स्वाहा॒ नम॑ ऋ॒क्साम॑य॒जुर्व॑षद॒स्वाहा॒ नमो॑
गा॒यत्री॑त्रि॒ष्टुप्ज॑गी॒वष॑द॒स्वाहा॒ नमः॑ पृ॒थिव्य॑न्तरि॒क्षम् द्यौर्व॑षद॒स्वाहा॒
नमो॑ऽग्नि॒र्वायुः॑ सू॒र्यो व॑षद॒स्वाहा॒ नमः॑ प्रा॒णो व्या॑नोऽपानो॒ वष॑द॒स्वाहा॒
नमो॑ऽन्न॒ म् कृ॑षिर्वृ॒ष्टिर्व॑षद॒स्वाहा॒ नमः॑ पि॒ता पु॒त्रः पौ॒त्रो व॑षद॒स्वाहा॒ नमो॑
भूर्भु॑वः सु॒वर्व॑षद॒स्वाहा॒ नमः॑ ।

॥ अथ॑र्वशिरसं ॥

इन्द्रो॑दधी॒ची अ॒स्थभि॑ । वृ॒त्राण्य॑प्रति॒ष्कृतः॑ । ज॒घान॑ न॒वती॑र्नव॑ ।
इ॒च्छन्न॑श्च॒स्य य॑च्छि॒रः । प॑र्व॒तिष्व॑प॒श्रित॑म् । तद्वि॑दच्छि॒र्यणा॑वति ।
अत्रा॑ह॒ गोर॑मन्वत । नाम॒ त्वष्ट॑रपी॒च्यम् । इ॒त्थ च॒न्द्रम॑सो गृ॒हे ।
इन्द्र॑मि॒द्गाथि॑नो॒ बृह॑त् । इन्द्र॑म॒र्केभि॑र॒र्किणः॑ । इन्द्रं॑ वा॒नीर॑नूषत ।
इन्द्र॑ इ॒द्वर्योः॑ स॒चा । स॒ म्मि॑श्ल आ॒वचो॑ यु॒जा । इन्द्रो॑ व॒ज्रीहि॑रण्यः ।
इन्द्रो॑ दी॒र्घाय॑ चक्ष॒सि । आ॒सूर्यः॑ रो॒हय॑द्वि॒वि । वि॒गोभि॑र॒द्रिभै॑रयत् ।
इन्द्र॑ वा॒जेषु॑ नो अव । स॒हस्र॑प्र॒धने॑षु च । अ॒ग्र आ॒भि॒रु॒तिभिः॑ ।
तमिन्द्रं॑ वा॒जया॑मसि । म॒हे वृ॒त्राय॑ ह॒न्तव॑ । सा वृ॒षा वृ॑षभोऽभु॒वत् ।
इन्द्रः॑ स दाम॒ने कृ॑तः । ओ॒जिष्ठः॑ स॒बले॑हि॒तः । दु॒म्नी श्लो॒की स॑सौ॒म्यः ।
गि॒रा व॑ज्रो॒ न स॑ म्भू॒तः । स॒बलो॑ अ॒नप॑च्युतः । व॒वक्षु॑रु॒ग्रो अ॑स्तू॒तः ।
॥ प्र॒त्यंगि॑रसं ॥

चक्षु॑षो हे॒ते मन॑सो हे॒ते । वा॒चोहे॑ते ब्र॒ह्मणो॑ हे॒ते ।
योमा॑ऽघ्रा॒युर॑भिदासति । तम॑ग्ने॒ मे॒न्याऽमे॑निं कृ॒णु ।
यो मा॑ चक्षु॒षा यो॑ मन॒स । यो वा॒चा ब्र॒ह्मणा॑घ्रा॒युर॑भिदासति ।
तया॑ऽग्ने॒ त्व म् मे॒न्या॑अ । अ॒मुम॑मे॒नि म् कृ॑णु ।

यत्किञ्चासौ मनसा यच्च वाचा । यज्ञैर्जुहोति यजुष हविर्भिः ।
 तन्मृत्युर्निर्ऋत्या संविदानः । पुरादिष्टादाहुतीरस्य हन्तु ।
 यातुधाना निर्ऋतिरादु रक्षः । ते अस्यघ्नन्त्वनृतेन सत्यम् ।
 इन्द्रेषिता आज्यमस्य मथ्नन्तु । मा तत्समृद्धि यदसौ करोति ।
 हन्मि तेऽहम् कृतं हविः । यो मे घोरमचीकृतः ।
 अपाचौ त उभौ बाहू । अपनह्याम्यास्यम् ।
 अग्नेर्देवस्य ब्रह्मणा । सर्वं तेऽवधिषंकृतम् ।
 पुराऽमुष्यं वषट्कारात् । यज्ञं देवेषु नस्कृधि ।
 स्विष्टमस्माकं भ्यूयात् । माऽस्मान् प्रापन्नरातयः ।
 अन्तिदूरे सतो अग्ने । भ्रातृव्यस्याभिदासतः ।
 वषट्कारेण वज्रेण । कृत्यां हन्मि कृतामहम् ।
 यो मा नक्तं दिवा सायम् । प्रातश्चाहो निपीयति ।
 अद्यातमिन्द्र वज्रेण । भ्रातृव्यम् पादयामसि ।
 प्राणो रक्षति विश्वमेजत् । इयो भूत्वा बहुदा बहूनि ।
 स इत्सर्वं व्यानशे । यो देवो देवेषु विभूरन्तः ।
 आवृद्धात् क्षेत्रियध्वगद्वेषः । तमित्प्राणम् मनसोपशिक्षत ।
 अग्रं देवानामिदमत्तु नो हविः । मनसश्चित्तेदम् ।
 भूतम् भव्यं च गुप्यते । तद्धिदेवेष्वग्रियम् ।
 आ न एतुपुरश्चरम् । सह देवैरिमं हवम् ।
 मनः श्रेयसि श्रेयसि । कर्मन्यज्ञपतिं दधत् ।
 जुषताम् मे वागिदं हविः । विराड् देवी पुरोहिता ।
 हव्यवाडनपायिनी । यया रूपाणि बहुदा वदन्ति ।
 पेशांसि देवाः परमे जनित्रे । सा नो विराडनपस्फुरन्ति ।
 वाग्देवी जुषतामिदं हविः । चक्षुर्देवानां ज्योतिरमृते न्यक्तम् ।
 अस्य विज्ञानाय बहुधा निधीयते । तस्य सुम्नमशीमहि ।
 मा नो हसीद्विचक्षणम् । आयुरिन्नः प्रतीर्यताम् ।
 अनन्धाश्चक्षुषावयम् । जीवा ज्योतिरशीमहि ।
 सुवज्योतिस्तामृतम् । श्रोत्रेण भद्रमुत शृण्वन्ति सत्यम् ।
 श्रोत्रेण वाचं बहुधोद्यमानाम् । श्रोत्रेण मोदश्च महश्च श्रूयते ।
 श्रोत्रेण सर्वा दिश आशृणोमि । येन प्राच्या उत दक्षिणा ।
 प्रतीच्येदिशः शृण्वन्त्युत्तरात् । तदिच्छ्रोत्रं बहुधोद्यमानम् ।
 अरान्नेमिः परिसर्वं बभूव ।

सिंहे व्याघ्र उत या पृदाकौ । त्विषिरग्नौ ब्राह्मणे सूर्येया ।
 इन्द्रं या देवी सुभगा जजान । सा न आगन्वर्चसा संविदाना ।
 या राजन्ये दुन्दुभावायतायाम् । अश्वस्य क्रन्दोपुरुषस्य मायौ ।

इन्द्रं या देवी सुभगा जजान । सा न आगन्वर्चसा संविदाना ।
 या हृस्तिनि द्वीपिनि या हिरण्ये । त्विषिरश्वेषु पुरुषेषु गोषु ।
 इन्द्रं या देवी सुभगा जजान । सा न आगन्वर्चसा संविदाना ।
 रथे अक्षेषु वृषभस्य वजे । वते पर्जन्ये वरुणस्य शुष्मे ।
 इन्द्रं या देवी सुभगा जजान । सा न आगन्वर्चसा संविदाना ।
 राडसि विराडसि । सम्राडसि स्वराडसि ।
 इन्द्राय त्वा तेजस्वते तेजस्वन्तः श्रीणामि ।
 इन्द्राय त्वोजस्वते ओजस्वन्तः श्रीणामि ।
 इन्द्राय त्वा पयस्वते पयस्वन्तः श्रीणामि ।
 इन्द्राय त्वाऽऽयुष्मते आयुष्मन्तः श्रीणामि ।
 तेजोऽसि । तत्ते प्रयच्छामि । तेजस्वदस्तु मे मुखम् ।
 तेजस्वच्छिरो अस्तु मे । तेजस्वान् विश्वतः प्रत्यङ् ।
 तेजसा संपिपृग्धि मा ।
 ओजोऽसि । तत्ते प्रयच्छामि । ओजस्वदस्तु मे मुखम् ।
 ओजस्वच्छिरो अस्तु मे । ओजस्वान् विश्वतः प्रत्यङ् ।
 ओजसा संपिपृग्धि मा ।
 पयोऽसि । तत्ते प्रयच्छामि । पयस्वदस्तु मे मुखम् ।
 पयस्वच्छिरो अस्तु मे । पयस्वान् विश्वतः प्रत्यङ् ।
 पयसा संपिपृग्धि मा ।
 आयुरसि । तत्ते प्रयच्छामि । आयुष्मदस्तु मे मुखम् ।
 आयुष्मच्छिरो अस्तु मे । आयुष्मान् विश्वतः प्रत्यङ् ।
 आयुषा संपिपृग्धि मा ।
 इममग्नि आयुषे वर्चसे कृधि । प्रियरेतो वरुण सोम राजन् ।
 मातेवास्मा अदिते शर्म यच्छ । विश्वे देवा जरदष्टिर्यथाऽसत् ।
 आयुरसि विश्वायुरसि । सर्वायुरसि सर्वमायुरसि ।
 यतो वातो मनोजवाः । यतः क्षरन्ति सिन्धवः ।
 तासान्त्वा सर्वासा रुचा । अभिषिचामि वर्चसा ।
 समुद्र इवासि गह्वना । सोम इवास्यदाभ्यः ।
 अग्निरिव विश्वतः प्रत्यङ् । सूर्य इव ज्योतिषा विभूः ।
 अपां यो द्रवणे रसः । तमहमस्मा आमुष्यायणाय ।
 तेजसे ब्रह्मवर्चसाय गृह्णामि ।
 अपां यो ऊर्मो रसः । तमहमस्मा आमुष्यायणाय ।
 ओजसे वीर्याय गृह्णामि ।
 अपां यो मध्यतो रसः । तमहमस्मा आमुष्यायणाय ।
 आयुषे दीर्घायुत्वाय गृह्णामि ।
 अहमस्मि प्रथमजा ऋतस्य । पूर्वं देवेभ्यो अमृतस्य नाभिः ।

यो मा ददाति स इदेव मा वाः । अहमन्नमन्नमदन्तमन्नि ।
पूर्वमग्नेरपि दहत्यन्नम् । यत्तो हासते अहमुत्तरेषु ।
व्यात्तमस्य पशवस्सुजम्भम् । पश्यन्ति धीरा प्रचरन्ति पाकाः ।
जहाम्यन्नजहाम्यन्नम् । अहमन्नं वशमिच्चरामि ।
समानमर्थं पर्येमि भुञ्जत् । को मामन्नं मनुष्यो दयेत ।
पराके अन्नं निहितं लोक एतत् । विश्वे देवैः पितृभिर्गुप्तमन्नम् ।
यदद्यते लुप्यते यत्परोप्यते । शतमी सा तनूमे बभूव ।
महान्तौ चरु सकृद्गुधेन पप्रौ । दिवं च पृथिवीं च साकम् ।
तत्सम्पिबन्तो न मिनन्ति वेधसः । नैतद्भूयो भवति नो कनीयः ।
अन्नं प्राणमन्नमपानमाहुः । अन्नं मृत्युं तमु जीवातुमाहुः ।
अन्नं ब्रह्माणो जरसं वदन्ति । अन्नमाहुः प्रजननं प्रजानाम् ।
मोघमन्नं विन्दते अप्रचेताः । सत्यं ब्रवीमि वध इत्स तस्य ।
नार्यमणं पुष्यति नो सखायम् । केवलाघो भवति केवलादि ।
अहं मेघस्तनयन्वर्षन्नस्मि । मामदन्त्यहमद्यन्यान् ।
अहंसदमृतो भवामि । मदादित्या अधि सर्वे तपन्ति ।
देवी वाचमजनयन्त देवाः । तां विश्वरूपाः पशवो वदन्ति ।
सा नो मन्त्रेषमूर्जं दुहाना । धेनुर्वागस्मानुपसुष्टुतैतु ।
यद्वागवदन्त्यविचेतनानि । राश्री देवानां निषसादमन्द्रा ।
चतस्र ऊर्जदुदुहे पयांसि क्वस्विदस्याः परमं जगाम ।
अनन्तामन्तादधि निर्मिता महीम् । यस्यां देवा अदधुर्भोजनानि ।
एकाक्षरमां द्विपदाषत्पदाञ्च । वाचं देवा उपजीवन्ति विश्वे ।
वाचं देवा उपजीवन्ति विश्वे । वाचं गन्धर्वाः पशवो मनुष्याः ।
वाचीमाविश्वा भुवनान्यर्पिता । सा नो हवं जुषतामिन्द्रपत्नी ।
वागक्षरं प्रथमजा ऋतस्य । वेदानां माताऽमृतस्य नाभिः ।
सानो जुषाणोप यज्ञमागात् । अर्वन्ती देवी सुहवामि अस्तु ।
यामृषयो मन्त्रकृतो मनीषिणः । अन्वैच्छन्देवास्तपसा श्रमेण ।
तां देवी वाचं हविषा यजामहे । सा नो दधातु सुकृतस्य लोके ।
चत्वारि वाक्परिमिता पदानि । तानि विदुर्ब्राह्मणा ये मनीषिणः ।
गुहा त्रीणि निहिता नेर्गयन्ति । तुरीयं वाचो मनुष्या वदन्ति ।
श्रद्धयाग्निः समिध्यते । श्रद्धया विन्दते हविः ।
श्रद्धां भगस्य मुर्धनि वचया वेदयामसि ।
प्रियं श्रद्ध ददतः । प्रियं श्रद्ध दिदासतः ।
प्रियं भोजेषु यज्वसु । इदं म उदितं कृधि ।
यथा देवा असुरेषु । श्रद्धामुप्रेषु चक्रिरे ।
एवं भोजेषु यज्वसु । अस्माकमुदितं कृधि ।
श्रद्धं देवा यजमानाः । वायुगोपा उपासते ।

श्रद्धां हृदय्यायाऽऽकृत्या । श्रद्धया हूयते हविः ।
 श्रद्धां प्रातर्हवामहे । श्रद्धां मध्यंदिनं परि ।
 श्रद्धां सूर्यस्य निमृचि । श्रद्धे श्रद्धापयेह मा ।
 श्रद्धा देवानधिर्वस्ते । श्रद्ध विश्वमिदं जगत् ।
 श्रद्धां कामस्य मातरम् । हविषं वर्धयामसि ।
 ब्रह्मजज्ञानं प्रथमं पुरस्तात् । विसीमतस्सुरुचो वेन आवः ।
 स बुध्निया उपमा अस्य विष्टाः । सतश्च योनिमसतश्च विवः ।
 पिता विराजामृषभो रयीणाम् । अन्तरिक्षं विश्वरूप आविविश ।
 तमकैरभ्यर्चन्ति वत्सम् । ब्रह्म सन्तं ब्रह्मणा वर्धयन्तः ।
 ब्रह्म देवानजनयत् । ब्रह्म विश्वमिदं जगत् ।
 ब्रह्मणः क्षत्रनिर्मितम् । ब्रह्म ब्राह्मण आत्मना ।
 अन्तरस्मिन्नेमे लोकाः । अन्तर्विश्वमिदं जगत् ।
 ब्रह्मैव भूतानां ज्येष्ठम् । तेन कोऽर्हति स्पर्धितुम् ।
 ब्रह्मन्देवास्त्रयस्त्रिंशत् । ब्रह्मन्निन्द्रप्रजापती ।
 ब्रह्मन् ह विश्वं भूतानि । नावीवान्तः समाहिता ।
 चतस्र आशाः प्रचरन्त्वग्नयः । इमं नो यज्ञं नयतु प्रजानन् ।
 घृतं पिन्वन्नजरं सुवीरम् । ब्रह्मसमिद्धवत्याहुतीनाम् ।
 आगावोअगमन्नुत भद्रमक्रन् । सीदन्तु गोष्ठेरणयन्त्वस्मे ।
 प्रजावतीः पुरुरूपा इह स्युः । इन्द्राय पूर्वीरुषसो दुहानाः ।
 इन्द्रो यज्वने पृणते चशिक्षति । उपददाति न स्वं मुषायति ।
 भूयो भूयो रयिमिदस्य वर्धयन् । अभिन्ने खिल्ले निदधाति देवयुम् ।
 न ता नशन्ति न दधाति तस्करः । नैनं अमित्रो व्यथिरदधर्षति ।
 देवाश्च याभिर्यजते ददाति च । ज्योगित्ताभिस्सचते गोपतिः सह ।
 न ता अवा रेणुके कातो अश्नुते । न सःस्कृतत्रपुपयन्ति ता अभि ।
 उरुणायमभयन्तस्य ता अनु । गावो मर्त्यस्य विचिरन्ति यज्वनः ।
 गावो भगो गाव इन्द्रो मे अच्छात् । गावः सोमस्य प्रथमस्य भक्षः ।
 इमा यागावस्सजना स इन्द्रः । इच्छामीद्धदा मनसा चिदिन्द्रम् ।
 यूयं गावो मेदयथा कृशंचित् । अश्लीलं चित्कृणुथा सुप्रतीकम् ।
 भद्रं गृहं कृणुथ भद्रवाचः । बृहद्वो वय उच्यते सभासु ।
 प्रजावतीः सूयवसं रिशन्तीः । शुद्धा अपस्सु प्रपाणे पिबन्तीः ।
 मावस्तेन इशत माघशंसः । परिवोहेती रुद्रस्य वृज्यात् ।
 उपेदमुपपचनम् । आसु गोषूप पृच्यताम् ।
 उपषभस्य रेतसि । उपेन्द्र तव वीर्ये ।
 ता सूयाचन्द्रमसा विश्वभृत्तमामहत् ।
 तेजो वसु मद्राजतो दिवि । समात्मानाचरतस्साम चारिणा ।
 ययो व्रतन्नमे जातुदेवयोः । उभावन्तौ परियात् अम्यौ ।

दिवो नरश्मीःस्तनुतोव्यण्वि । उभा भुवन्तीभुवना कविक्रतू ।
सूर्या न चन्द्रा चरतो हतामती । पतीद्युमद्विश्वविदा उभा दिवः ।
सूर्या उभा चन्द्रमसा विचक्षणा । विश्ववारा वरिवो भावरेण्या ।
ता नोऽवतं मतिमन्ता महिप्रता । विश्व वपरि प्रतरणा तरन्ता ।
सुवर्विदा दृश्ये भूरि रश्मी । सूर्या हि चन्द्रा वसुत्वेष दर्शता ।
मनस्विनो भाऽनुचरतोनुसदिवम् । अस्य श्रवो नद्यः सप्त बिभ्रति ।
द्यावाक्षामा पृथिवी दर्शतं वपुः । अस्मे सूयां चन्द्रमसाऽभिचक्षे ।
श्रद्धेकमिन्द्र चरतो विचर्तुरम् । पुर्वापरं चरतोमाययैतौ ।
शिशू क्रीडन्तौ परियातो अध्वरम् । विश्वान्यन्यो भुवनाऽभिचष्टे ।
ऋतूनन्यो विदधज्जायते पुनः ।

हिरण्यवर्णाः शुचयः पावका यासु जातः कश्यपो यास्विन्द्रः ।
अग्निं या गर्भम् दधिरे विरूपास्तान् आपश्शः स्योना भवन्तु ॥
यासां राजा वरुणो याति मध्ये सत्यानुते अवपश्यम् जनानाम् ।
मधुश्चुतश्शुचयो याः पावकास्ता न आपश्शः स्योना भवन्तु ॥
यासाम् देवा दिवि कृण्वन्ति भक्षं या अन्तरिक्षे बहुधा भवन्ति ।
याः पृथिवीम् पयसोन्दन्ति शुक्रास्ता न आपश्शः स्योना भवन्तु ॥
शिवेन मा चक्षुषा पश्यतापश्शिवया तनुवोप स्पृशत त्वचम् मे ।
सर्वाः अग्नीः रप्सुषदो हुवो वो मयि वर्चो बलमोजो निधत्त ॥

आपोभद्रा गूतमिदाप आसुरणीषोमौ बिभ्रात्याप इत्ताः ।
तीव्रो रसो मधुपृचामरंगम् आ मा प्राणेन सह वर्च सागन् ॥
आदित्पश्याम्युत वा शृणोम्यामा घोषो गच्छति वाङ् न आसाम् ।
मन्येभेजानो अमृतस्य तर्हि हिरण्यवर्णा अतृपं यदावः ॥

नासदासीन्नो सदासीत्तदानीम् । नासीद्भजो नो व्योमा परो यत् ।
किमावरिवः कुह कस्य शर्मन् । अम्भः किमासीद्गहनं गभीरम् ।
न मृत्युरमृतं तर्हि न । रात्रिया अह्ना आसीत् प्रकेतः ।
आनीदवातः स्वधया तदेकम् । तस्माद्धान्यं न परः किंचनास ।
तम आसीत्तमसा गूढमग्रे प्रकेतम् । सलिलः सर्वं मा इदम् ।
तुच्छेनाभ्वपि हितं यदासीत् । तमसस्तन्महिना जायतैकम् ।
कामस्तदग्रे समवर्तताधि । मनसो रेतः प्रथमं यदासीत् ।
स तो बन्धुमसति निरविन्दन् । हृदिप्रतीप्या क्वयो मनीषा ।
तिरश्चीनो विततो रश्मिरेषाम् । अधस्विदासी ३ दुपरिस्विदासी ३ त् ।
रेतोधा आसन्महिमा न आसन् । स्वधा अवस्तात् प्रयतिः पुरस्तात् ।
को अद्ध वेद क इह प्रवोचत् । कुत आ जाता कुत इयं विसृष्टिः ।

अ॒र्वा॒ग्दे॒वा अ॒स्य वि॒सर्ज॑नाय । अथा॒ को वे॑द्यत॒ आ ब॒भूव॑ ।
 इ॒यं वि॒सृष्टि॑र्यत॒ आ ब॒भूव॑ । यदि॒ वा द॒धे यदि॑ वा॒ न ।
 यो अ॒स्याध्य॑क्षः पर॒मे व्योम॑न् । सो अ॒ंग वे॑द॒ यदि वा॒ न वे॑द ।
 किं॑ स्व॒द्वनं॑ क॒ उ स॑ वृ॒क्ष आ॑सीत् । यतो॒ द्यावा॑पृथि॒वी निष्ट॑त॒क्षुः ।
 मनी॑षिणो॒ मनसा॑पृच्छते॒ दुतत् । यद॒ध्यति॑ष्ट॒द्भुवनानि॑ धारयन् ।
 ब्रह्म॑ वनं॒ ब्रह्म॑ सवृ॒क्ष आ॑सीत् । यतो॒ द्यावा॑पृथि॒वी निष्ट॑त॒क्षुः ।
 मनी॑षिणो॒ मनसा॑ वि॒ब्रवी॑मि वः । ब्रह्मा॒ध्यति॑ष्ट॒द्भुवनानि॑ धारयन् ।
 प्रा॒तर॒ग्निं प्रा॒तरि॒न्द्रं॑ हवामहे । प्रा॒तर्मि॑त्रावरु॒णा प्रा॒तर॒श्विना॑ ।
 प्रा॒तर्भ॑गं पू॒षणं॑ ब्रह्म॒णस्पति॑म् । प्रा॒तः सोम॑मु॒त् रुद्रं॑ हु॒वेम॑ ।
 प्रा॒तर्जि॑तं भ॒गमु॒ग्रं हु॒वेम॑ । व॒यं पु॒त्रमदि॑तेर्यो॒ वि॒धर्ता॑ ।
 आ॒ग्नश्चि॑द्यं म॒न्यमान॑स्तुरश्चि॒त् । राजा॑चि॒द्यं भ॒गं भ॒क्षीत्याह॑ ।
 भ॒ग प्र॑णे॒तर्भ॑ग॒ सत्य॑राधः । भ॒गेमां॑ धि॒यमु॒दव॑द॒दन्नः॑ ।
 भ॒ग प्र॑णो॒ जन॑य॒ गोभि॑रश्चै॒ः । भ॒ग प्र॑नृभिर्नृ॒वन्तः॑ स्याम ।
 उ॒तेदा॑नी भ॒गव॑न्तः स्याम । उ॒त प्र॑पि॒त्व उ॒त म॒ध्य अ॒ह्नाम् ।
 उ॒तोदि॑ता म॒घव॑न्त॒सूर्य॑स्य । व॒यं दे॒वानां॑ सु॒मतौ॑ स्याम ।
 भ॒ग ए॒व भ॒गवा॑ः अस्तु दे॒वाः । तेन॑ व॒यं भ॒गव॑न्तः स्याम ।
 तन्त्वा॑ भ॒ग सर्व॑ इज्जो॒हवी॑मि । स॒नो भ॒ग पुर॑ ए॒ता भ॒वेह॑ ।
 स॒मध्व॑रयो॒षसो॑न॒मन्त॑ । दधि॒क्रावे॑व॒ शुच॑ये॒ पदा॑य ।
 अ॒र्वा॒चीनं॑ व॒सुवि॑दं भ॒गन्नः॑ । रथ॑मि॒वाश्वा॑ वा॒जिन॑ आव॒हन्तु॑ ।
 अ॒श्वावि॑ती॒गोम॑तीर्न॒ उषा॑सः । वी॒रव॑तीः स॒दमु॑च्छन्तु॒ भद्राः॑ ।
 घृ॒तं दु॒हाना॑ वि॒श्वतः॑ प्र॒पी॒नाः । यू॒यं पा॑त॒ स्व॒स्तिभिः॑ सदा॑ नः ।

अ॒ग्निर्नः॑ पा॒तु कृ॑त्तिकाः । नक्ष॑त्रं दे॒वमि॑न्द्रि॒यम् ।
 इ॒दमा॑सां वि॒चक्षण॑म् । ह॒विरा॑सं जु॒होत॑न ।
 य॒स्य भा॑न्ति॒ रश्म॑यो॒ यस्य॑ के॒तवः॑ । य॒स्येमा॑ वि॒श्वा भु॑वनानि॒ सर्वा॑ ।
 स कृ॑त्तिकाभि॒रभिस॑वसानः । अ॒ग्निर्नो॑ दे॒वस्सु॑विते॒ दधा॑तु ॥
 प्र॒जाप॑ते रोहि॒णीवे॑तु॒ पत्नी॑ । वि॒श्वरू॑पा बृ॒हती॑ चि॒त्रभा॑नुः ।
 सा नो॑ य॒ज्ञस्य॑ सु॒विते॑ दधातु । यथा जी॒वेम॑ श॒रद॑स्सवी॒राः ।
 रोहि॑णी दे॒व्युद॑गात्पु॒रस्ता॑त् । वि॒श्वा रू॑पणि॒ प्रति॑मो॒दमा॑ना ।
 प्र॒जाप॑तिं ह॒विषा॑ वर्धयन्ती । प्रि॒या दे॒वाना॑मु॒पया॑तु॒ यज्ञ॑म् ॥
 सोमो॑ राजा॒ मृग॑शी॒र्षेण॑ आ॒गन् । शि॒वं नक्ष॑त्रं प्रि॒यम॑स्य॒ धाम॑ ।
 आ॒प्याय॑मानो बहु॒धा जने॑षु । रे॒तः प्र॒जां य॑ज॒मानो॑ दधातु ।
 यत्ते॑ नक्ष॑त्रं मृ॒गशी॑र्षमस्ति । प्रि॒यं रा॑जन् प्रि॒यत॑मं प्रि॒याणा॑म् ।
 तस्मै॑ ते सोम॒ ह॒विषा॑ वि॒धेम॑ । श॒न्न ए॒धि द्वि॑पदे शं चतु॒ष्पदे॑ ॥
 आ॒र्द्रया॑ रु॒द्रः प्रथ॑मा न ए॒ति । श्रेष्ठो॑ दे॒वानां॑ पति॒रघ्न॑याना॑म् ।
 नक्ष॑त्रमस्य ह॒विषा॑ वि॒धेम॑ । मा नः॑ प्र॒जा री॑रि॒षन्मो॑त वी॒रान् ।

हेति रुद्रस्य परिणो वृणक्तु । आर्द्रा नक्षत्रं जुषतां हविर्नः ।
 प्रमुञ्चमानौ दुरितानि विश्वा । अपाघशंसन्नुदतामरातिम् ॥
 पुनर्नो देव्यदितिस्पृणोतु । पुनर्वसूनः पुनरेता यज्ञम् ।
 पुनर्नो देवा अभियन्तु सर्वे । पुनः पुनर्वो हविषा यजामः ।
 एवा न देव्यदितिरनर्वा । विश्वस्य भर्त्री जगतः प्रतिष्ठा ।
 पुनर्वसू हविषा वर्धयन्ती । प्रियम् देवानामप्येतु पार्थः ॥
 बृहस्पतिः प्रथमं जायमानः । तिष्यम् नक्षत्रमभि संबभूव ।
 श्रेष्ठो देवानां पृतनासुजिष्णुः । दिशोऽनु सर्वा अभयन्नो अस्तु ।
 तिष्यः पुरस्ताद्भुत मध्यतो नः । बृहस्पतिर्नः परिपातु पश्चात् ।
 बाधेतान्द्वेषो अभयं कृणुताम् । सुवीर्यस्य पतयस्याम ॥
 इदं सर्पेभ्यो हविरस्तु जुष्टम् । आश्रेषा येषामनुयन्ति चेतः ।
 ये अन्तरिक्षं पृथिवीं क्षियन्ति । ते नस्सर्पासो हवमागमिष्ठाः ।
 ये रोचने सूर्यस्यापि सर्पाः । ये दिवं देवीमनुसञ्चरन्ति ।
 येषमश्रेषा अनुयन्ति कामम् । तेभ्यस्सर्पेभ्यो मधुमज्जुहोमि ॥
 उपहृताः पितरो ये मघासु । मनोजवसस्सुकृतस्सुकृत्याः ।
 ते नो नक्षत्रे हवमागमिष्ठाः । स्वधाविर्यज्ञं प्रयतं जुषन्ताम् ।
 ये अग्निदग्धा येऽनग्निदग्धाः । येऽमुल्लोकं पितरः क्षियन्ति ।
 याश्च विद्यया उ च न प्रविद्य । मघासु यज्ञं सुकृतम् जुषन्ताम् ॥
 गवां पतिः फल्गुनीनामसि त्वम् । तदर्यमन् वरुणमित्र चारु ।
 तं त्वा वयं सनितारं सनीनाम् । जीवा जीवन्तमुप संविशेम ।
 येनेमा विश्वा भुवनानि सञ्जिता । यस्य देवा अनुसंयन्ति चेतः ।
 अर्यमा राजाऽजरस्तु विष्मान् । फल्गुनीनामृषभो रोरवीति ॥
 श्रेष्ठो देवानाम् भगवो भगासि । तत्त्वा विधुः फल्गुनीस्तस्य वित्तात् ।
 अस्मभ्यं क्षत्रमजरं सुवीर्यम् । गोमदश्चवदुपसचुदेह ।
 भगोह दाता भग इत्प्रदाता । भगो देवीः फल्गुनीराविवेश ।
 भगस्येत्तं प्रसवं गमेम । यत्र देवैस्सधमादं मदेम ॥
 आयातु देवस्सवितोपयातु । हिरण्ययेन सुवृता रथेन ।
 वहन् हस्तं सुभं विद्यनापसम् । प्रयच्छन्तं पपुरि पुण्यमच्छ ।
 हस्तः प्रयच्छ त्वमृतं वसीयः । दक्षिणेन प्रतिगृभ्णीम एनत् ।
 दातारमद्य सविता विदेय । यो नो हस्ताय प्रसुवाति यज्ञम् ॥
 त्वष्टा नक्षत्रमभ्येति चित्राम् । सुभं संसंयुवति राचमानाम् ।
 निवेशयन्नमृतान्मर्त्यांश्च । रूपाणि पिशन् भुवनानि विश्वा ।
 तन्नस्त्वष्टा तद् चित्रा विचष्टाम् । तन्नक्षत्रं भूरिदा अस्तु मह्यम् ।
 तन्नः प्रजां वीरवतीं सनोतु । गोभिर्नो अश्वैस्समनक्तु यज्ञम् ॥
 वायुर्नक्षत्रमभ्येति निष्याम् । तिग्मशृंगो वृषभो रोरुवाणः ।
 समीरयन् भुवना मातरिश्वा । अप द्वेषांसि नुदतामरातीः ।

तन्नो वायस्तद् निष्या शृणोतु । तन्नक्षत्रं भूरिदा अस्तु मह्यम् ।
 तन्नो देवासो अनुजानन्तु कामम् । यथा तरेम दुरितानि विश्वा ॥
 दूरमस्मच्छत्रवो यन्तु भीताह । तदिन्द्राग्नी कृणुताम् तद्विशाखे ।
 तन्नो देवा अनुमदन्तु यज्ञम् । पश्चात् पुरस्तादभयन्नो अस्तु ।
 नक्षत्राणामधिपत्नी विशाखे । श्रेष्ठाविन्द्राग्नी भुवनस्य गोपौ ।
 विषूचश्शत्रून्पबाधमानौ । अपक्षुधन्नुदतामरातिम् ॥
 पूर्णा पश्चाद्भुत पूर्णा पुरस्तात् । उन्मध्यतः पौर्णमासी जिगाय ।
 तस्या देवा अधिसंवसन्तः । उत्तमे नाक इह मादयन्ताम् ।
 पृथ्वी सुवर्चा युवतिः सजोषाः पौर्णमास्युदगाच्छोभमाना ।
 आप्याययन्ती दुरितानि विश्वा । उरुं दुहां यजमानाय यज्ञम् ।
 ऋद्ध्यास्म हव्यैर्नमसोपसद्य । मित्रं देवं मित्रधेयं नो अस्तु ।
 अनुराधान् हविषा वर्धयन्तः । शतं जीविम शरदः सवीराः ।
 चित्रम् नक्षत्रमुदगात्पुरस्तात् । अनुराधा स इति यद्वदन्ति ।
 तन्मित्र एति पथिभिर्देवयानैः । हिरण्ययैर्विततैरन्तरिक्षे ॥
 इन्द्रो ज्येष्ठामनु नक्षत्रमेति । यस्मिन् वृत्रं वृत्रं तूयो ततार ।
 तस्मिन्वयममृतं दुहानाः । क्षुधन्तरेम दुरितिं दुरिष्टिम् ।
 पुरन्दराय वृषभाय धृष्णवे । अषाढाय सहमानाय मीढुषे ।
 इन्द्राय ज्येष्ठा मधुमद्दुहाना उरुं कृणोतु यजमानस्य लोकम् ॥
 मूलं प्रजां वीरवतीं विदेय । पराच्येतु निर्ऋतिः पराचा ।
 गोभिर्नक्षत्रं पशुभिस्समक्तम् । अहर्भूयाद्यजमानाय मह्यम् ।
 अहर्नो अद्य सुविते ददातु । मूलं नक्षत्रमिति यद्वदन्ति ।
 पराचीं वाचा निर्ऋतिं नुदामि । शिवं प्रजये शिवमस्तु मह्यम् ॥
 या दिव्या आपः पर्यसा सम्बभूवुः । या अन्तरिक्ष उत पार्थिवीर्याः ।
 यासामषाढा अनुयन्ति कामम् । ता न आपः शः स्योना भवन्तु ।
 याश्च कूप्या याश्च नाद्यास्समुद्रियाः । याश्च वैशन्तीरुत प्रासचीर्याः ।
 यासामषाढा मधु भक्षयन्ति । ता न आपः शः स्योना भवन्तु ॥
 तन्नो विश्वे उप शृण्वन्तु देवाः । तदषाढा अभिसंयन्तु यज्ञम् ।
 तन्नक्षत्रं प्रथतां पशुभ्यः । कृषिर्वृष्टिर्यजमानाय कल्पताम् ।
 शुभ्राः कन्या युवतयस्सुपेशसः । कर्मकृतस्सुकृतो वीर्यावतीः ।
 विश्वान् देवान् हविषा वर्धयन्तीः । अषाढाः काममुपायन्तु यज्ञम् ॥
 यस्मिन् ब्रह्माभ्यजयत्सर्वमेतत् । अमुञ्च लोकमिदमूच सर्वम् ।
 तन्नो नक्षत्रमभिजिद्विजित्य । श्रियं दधात्वहणीयमानम् ।
 उभौ लोकौ ब्रह्मणा सज्जितमौ । तन्नो नक्षत्रमभिजिद्विचष्टाम् ।
 तस्मिन्वयं पृतनास्सज्जयेम । तन्नो देवासो अनुजानन्तु कामम् ॥
 शृण्वन्ति श्रोणाममृतस्य गोपाम् । पुण्यामस्या उपशृणोमि वाचम् ।
 महीं देवीं विष्णुपत्नीमजूर्याम् । प्रतीची मेनाः हविषा यजामः ।

त्रेधा विष्णुरुरुगायो विचक्रमे । महीं दिवं पृथिवीमन्तरिक्षम् ।
 तच्छ्रेणैतिश्रव इच्छमाना । पुण्यं श्लोकं यजमानाय कृण्वती ॥
 अष्टौ देवा वसवस्सोम्यासः । चतस्रो देवीरजराः श्रविष्ठाः ।
 ते यज्ञं पान्तु रजसः पुरस्तात् । संवत्सरीणममृतं स्वस्ति ।
 यज्ञं नः पान्तु वसवः पुरस्तात् । दक्षिणतोऽभियन्तु श्रविष्ठाः ।
 पुण्यन्नक्षत्रमभि संविशाम । मा नो अरातिरघशंसाऽगन् ॥
 क्षत्रस्य राजा वरुणोऽधिराजः । नक्षत्राणां शतभिषग्वसिष्ठः ।
 तौ देवेभ्यः कृणुति दीर्घमायुः । शतं सहस्रा भेषजानि धत्तः ।
 यज्ञन्नो राजा वरुण उपयातु । तन्नो विश्वे अभि संयन्तु देवाः ।
 तन्नो नक्षत्रं शतभिषग्जुषाणम् । दीर्घमायुः प्रतिरद्वेषजानि ॥
 अज एकपादुदगात्पुरस्तात् । विश्वा भूतानि प्रति मोदमानः ।
 तस्य देवाः प्रसवं यन्ति सर्वे । प्रोष्ठपदासो अमृतस्य गोपाः ।
 विभ्राजमानस्समिधा न उग्रः । आऽन्तरिक्षमरुहदगन्द्याम् ।
 तं सूर्यं देवमजमेकपादम् । प्रोष्ठपदासो अनुयन्ति सर्वे ॥
 अहिर्बुध्नियः प्रथमा न एति । श्रेष्ठो देवानामुत मानुषाणाम् ।
 तं ब्राह्मणास्सोमपास्सोम्यासः । प्रोष्ठपदासो अभिरक्षन्ति सर्वे ॥
 चत्वार एकमभि कर्म देवाः । प्रोष्ठपदा स इति यान् वदन्ति ।
 ते बुध्नियं परिषद्यं स्तुवन्तः । अहिं रक्षन्ति नमसोपसद्य ॥
 पूषा रेवत्यन्वेति पन्थाम् । पुष्टिपती पशुपा वाजवस्त्यौ ।
 इमानि हव्या प्रयता जुषाणा । सुगौर्नो यानैरुपयातां यज्ञम् ।
 क्षुद्रान् पशून् रक्षतु रेवती नः । गावो नो अश्वान् अन्वेतु पूषा ।
 अन्नं रक्षन्तौ बहुदा विरूपम् । वाजं सनुतां यजमानाय यज्ञम् ॥
 तदश्वनावश्वयुजोपयाताम् । शुभङ्गमिष्टौ सुयमेभिरश्वैः ।
 स्वं नक्षत्रं हविषा यजन्तौ । मध्वासम्पृक्तौ यजुषा समक्तौ ।
 यौ देवानां भिषजौ हव्यवाहौ । विश्वस्य दूतवमृतस्य गोपौ ।
 तौ नक्षत्रं जुषाणोपयाताम् । नमोऽश्विभ्यो कृणुमोऽश्वयुग्भ्याम् ॥
 अप पाप्मानं भरणीर्भरन्तु । तद्यमो राजा भगवान् विचष्टाम् ।
 लोकस्य राजा महतो महान् हि । सुगं नः पन्थामभयं कृणोतु ।
 यस्मिन्नक्षत्रे यम एति राजा । यस्मिन्नेनमभ्यर्षिचन्त देवाः ।
 तदस्य चित्रं हविषा यजाम । अप पाप्मानं भरणीर्भरन्तु ॥

निवेशनी सङ्गमनी वसूनां विश्वा रूपाणि वसून्त्यावेशयन्ती ।
 सहस्रपोषं सुभगा रराणा सा न आगन्वर्चसा संविदाना ॥
 यत्ते देवा अदधुर्भागधेयममावास्ये संवसन्तो महित्वा ।
 सा नो यज्ञं पिपृहि विश्ववारे रयिन्नो धेहि सुभगे सुवीरम् ॥

नवो नवो भवति जायमानोऽहो॑ केतु॑रुषसामेत्यग्रे॑ ।
भा॒गं दे॒वेभ्यो॑ वि॒दधा॒त्याय॑न् प्र॒चन्द्र॑मा॒स्तिरि॑ति दी॒र्घमा॑युः ॥
यमा॑दि॒त्या अ॒शुमा॑प्या॒यय॑न्ति॒ यम॑क्षि॒तम॑क्षि॒तयः॑ पि॒बन्ति॑ ।
तेन॑ नो॒ राजा॑ वरु॒णो बृ॒हस्प॑ति॒राप्या॑य॒यन्तु॑ भुव॑नस्य गो॒पाः ॥

ये वि॒रूपे॑ सम॑नसा सं॒व्यय॑न्ती । सम॑नं तन्तुं॑ परि॒तात॑नाते॑ ।
वि॒भू प्र॒भू अनु॑भू वि॒श्वतो॑ हुवे । ते नो॒ नक्ष॑त्रे ह॒वम॑गमे॒तम् ।
व॒यं दे॒वी ब्र॒ह्मणा॑ संवि॒दानाः॑ । सुर॑त्ना॒सो दे॒ववी॑तिं दधा॒नाः ।
अ॒हो॒रात्रे॑ ह॒विषा॑ वर्ध॒यन्तः॑ । अति॑ पा॒प्मान॑मति॒मुक्त्या॑गमे॒म ।
प्रत्यु॑वदृ॒श्याय॑ती । व्यु॒च्छन्ती॑ दु॒हिता॑ दि॒वः ।
अ॒पो म॒ही वृ॑णुते चक्षु॑षा । तमो॒ ज्योति॑ष्कृ॒णोति॑ स॒नरी॑ ।
उ॒दुस्त्रि॑या॒स्सच॑ते॒ सूर्यः॑ । स चा॑ उ॒द्यन्न॑क्ष॒त्रम॑र्चि॒मत् ।
तवे॑दु॒षो व्यु॑षि॒ सूर्य॑स्य च । संभ॑क्तेन गमे॒महि॑ ।
तन्नो॑ नक्ष॒त्रम॑र्चि॒मत् । भानु॑मत्तेज॑ उ॒च्चर॑त् ।
उप॑य॒ज्ञमि॒हाग॑मत् ।
प्र॒नक्ष॑त्राय॒देवाय॑ । इन्द्रा॒येन्दुः॑ हवामहे ।
स नः॑ स॒विता॑ सु॒वत्स॑निम् । पु॒ष्टिदा॑ वी॒रव॑त्त॒मम् ।
उ॒दुत्यं॑ जा॒तवे॑दसं दे॒वं वह॑न्ति के॒तवः॑ । द॒शे वि॒श्वाय॑ सूर्य॑म् ।
चि॒त्रं दे॒वाना॑मु॒दगा॑दनी॒कं चक्षु॑मि॒त्रस्य॑ वरु॒णस्या॑ग्नेः ।
आऽप्रा॒द्यावा॑ पृथि॒वी अ॒न्तरि॑क्षं सूर्य॑ आ॒त्मा जग॑तस्त॒स्थुष॑श्च ।
आदि॑तिर्न उरु॒ष्यत्व॑दि॒तिः शर्म॑ यच्छतु । अदि॑तिः पा॒त्वह॑सः ।
म॒हीमू॒षु मा॑तरं सु॒व्रता॑ना॒मृत॑स्य॒ पत्नी॑मवसे हुवे॒म ।
तुवि॑क्ष॒त्राम॑जर॒न्तीमु॒रूची॑ सु॒शमा॑ण॒मदि॑तिं सु॒प्रणी॑तम् ।
इ॒दं वि॒ष्णुर्वि॑चक्रमे॒ त्रेधा॑ नि॒दधे॑ प॒दम् । समू॑ढ॒मस्य॑ पा॒सुरे॑ ।
प्र॒तद्वि॒ष्णुस्त॑वते वी॒र्या॑य । मृ॒गो न भी॑मः कु॒चरो॑ गि॒रिष्ठाः॑ ।
यस्यो॑रु॒षु त्रि॑षु वि॒क्रम॑णेषु । अधि॑क्षि॒यन्ति॑ भुव॑नानि वि॒श्वानि॑ ।
अ॒ग्नि॒मूर्धा॑ दि॒वः क॒कुत्प॑तिः पृथि॒व्या अ॒यम् । अ॒पाः रेता॑सि जि॒न्वति॑ ।
भुवो॑ य॒ज्ञस्य॑ रज॒सश्च॑ ने॒ता यत्रा॑नियु॒द्धिः सच॑से शि॒वाभिः॑ ।
दि॒वि मूर्धा॑नं दधि॑षे सु॒वषां॑ जि॒ह्वा॒मग्ने॑ चकृ॒षे ह॒व्यवा॑हम् ।
अनु॑नोऽद्यानु॒मति॑र्य॒ज्ञं दे॒वेषु॑ मन्यताम् ।
अ॒ग्निश्च॑ ह॒व्यवा॑हनो भव॑तां दा॒शुषे॑ मयः ।
अ॒न्विद॑नु॒मते॑ त्वं म॒न्यासै॑ शं॒च कृ॑धि ।
ऋ॒त्वे द॑क्षाअ॒य नो॑हि नु प्र॒ण आ॒यूषि॑ तारिषः ।
ह॒व्यवा॑ह॒मभि॑माति॒षाह॑म् । र॒क्षो॒हणं॑ पृ॒तना॑सु जि॒ष्णुम् ।
ज्योति॑ष्मन्तं दी॒द्यत्तं॑ पुर॒न्धिम् । अ॒ग्निं स्वि॑ष्ट॒कृत॑ माहु॒वे॒म ।
स्वि॑ष्ट॒मग्ने॑ अ॒भित॑त्पृ॒णाहि॑ । वि॒श्वानि॑ दे॒व पृ॑तना अ॒भिष्य॑ ।

उरुन्नः पन्थां प्रदिशन्विभाहि । ज्योतिष्मद्वेह्यजरन्न आयुः ॥

अ॒ग्नये॒ स्वाहा॒ कृत्तिका॑भ्यः॒ स्वाहा॑ ।
अ॒म्बायै॒ स्वाहा॑ दु॒लायै॒ स्वाहा॑ ।
नि॒तन्त्यै॒ स्वाहा॑ऽभ्रय॑न्तै॒ स्वाहा॑ ।
मे॒घय॑न्त्यै॒ स्वाहा॑ वर्ष॑यन्त्यै॒ स्वाहा॑ ।
चु॒पुणिका॑यै॒ स्वाहा॑ ।
प्र॒जाप॑तये॒ स्वाहा॑ रो॒हिण्यै॒ स्वाहा॑ ।
रोच॑मानायै॒ स्वाहा॑ प्र॒जाभ्यः॒ स्वाहा॑ ।
सो॒माय॑ स्वाहा॑ मृ॒गशी॑र्षाय॒ स्वाहा॑ ।
इ॒न्वका॑भ्यः॒ स्वाहा॑ शै॒षधी॑भ्यः॒ स्वाहा॑ ।
रा॒ज्याय॑ स्वाहा॑ऽभिजि॑त्यै॒ स्वाहा॑ ।
रु॒द्राय॑ स्वाहा॑ऽऽ॒द्रायै॒ स्वाहा॑ ।
पि॒न्वमा॑नायै॒ स्वाहा॑ प॒शुभ्यः॒ स्वाहा॑ ।
अ॒दित्यै॒ स्वाहा॑ पु॒नर्व॑सुभ्याम् ।
स्वाहा॑ भू॑त्यै॒ स्वाहा॑ प्र॒जात्यै॒ स्वाहा॑ ।
बृ॒हस्प॑तये॒ स्वाहा॑ ति॒ष्याय॑ स्वाहा॑ ।
ब्र॒ह्मव॑र्चसाय॒ स्वाहा॑ ।
स॒र्पेभ्यः॒ स्वाहा॑ऽऽश्रे॑षाभ्यः॒ स्वाहा॑ ।
द॒न्तशू॑केभ्यः॒ स्वाहा॑ ।
पि॒तृभ्यः॒ स्वाहा॑ म॒घाभ्यः॑ ।
स्वाहा॑ऽन॒घाभ्यः॒ स्वाहा॑ऽग॒दाभ्यः॑ ।
स्वाहा॑ऽरु॒न्धती॑भ्यः॒ स्वाहा॑ ।
अ॒र्य॒म्णे स्वाहा॑ फ॒ल्गु॑नीभ्याः॒ स्वाहा॑ ।
प॒शुभ्यः॒ स्वाहा॑ ।
भ॒गाय॑ स्वाहा॑ फ॒ल्गु॑नीभ्याः॒ स्वाहा॑ ।
श्रे॒ष्ठाया॑य॒ स्वाहा॑ ।
स॒वि॒त्रेस्वाहा॑ ह॒स्ताय॑ ।
स्वाहा॑दि॒दते॒ स्वाहा॑ पृ॒णते॑ ।
स्वाहा॑ प्र॒यच्छ॑ते॒ स्वाहा॑ प्र॒तिगृ॑भ्णते॒ स्वाहा॑ ।
त्वष्ट्रे॑ स्वाहा॑ चि॒त्रायै॒ स्वाहा॑ ।
चै॒त्राय॑ स्वाहा॑ प्र॒जायै॒ स्वाहा॑ ।
वा॒यवे॑ स्वाहा॑ नि॒ष्यायै॒ स्वाहा॑ ।
का॒म॒चा॒राय॑ स्वाहा॑ऽभिजि॑त्यै॒ स्वाहा॑ ।
इ॒न्द्रा॒ग्निभ्याः॒ स्वाहा॑ वि॒शाखा॑भ्याः॒ स्वाहा॑ ।
से॒ष्टया॑य॒ स्वाहा॑ऽभिजि॑त्यै॒ स्वाहा॑ ।

पौर्णमास्यै स्वाहा कामाय स्वाहा गत्यै स्वाहा ।
 मित्राय स्वाहाऽनूराधेभ्यः स्वाहा ।
 मित्रधेयाय स्वाहाऽभिजित्यै स्वाहा ।
 इन्द्राय स्वाहा । ज्येष्ठायै स्वाहा ।
 ज्येष्ठयाय स्वाहाऽभिजित्यै स्वाहा ।
 प्रजापतये स्वाहा मूलाय स्वाहा ।
 प्रजायै स्वाहा ।
 अद्भ्यः स्वाहाऽषाढाभ्यः स्वाहा ।
 समुद्राय स्वाहा कामाय स्वाहा ।
 अभिजित्यै स्वाहा ।
 विश्वेभ्यो देवेभ्यः स्वाहाऽषाढाभ्यः स्वाहा ।
 अनपज्य्याय स्वाहा जित्यै स्वाहा ।
 ब्रह्मणे स्वाहाऽभिजिते स्वाहा ।
 ब्रह्मलोकाय स्वाहाऽभिजित्यै स्वाहा ।
 विष्णवे स्वाहा । श्रोणायै स्वाहा ।
 श्लोकाय स्वाहा । श्रुतायस्स्वाहा ।
 वसुभ्यः स्वाहा श्रविष्ठाभ्यः स्वाहा ।
 अग्राय स्वाहा परीत्यै स्वाहा ।
 वरुणाय स्वाहा शतभिषजे स्वाहा ।
 भेषजेभ्यः स्वाहा ।
 अजायैकपदे स्वाहा । प्रोष्ठपदेभ्यः स्वाहा ।
 तेजसे स्वाहा । ब्रह्मवर्चसाय स्वाहा ।
 अहये बुधियाय स्वाहा । प्रोष्ठपदेभ्यः स्वाहा ।
 पूष्णे स्वाहा । रेवत्यै स्वाहा ।
 पशुभ्यः स्वाहा ।
 अश्विभ्याः स्वाहा । ऽश्वयुग्भ्याः स्वाहा ।
 श्रोत्राय स्वाहा श्रुत्यै स्वाहा ।
 यमाय स्वाहाऽपभरणीभ्यः स्वाहा ।
 राज्याय स्वाहाऽभिजित्यै स्वाहा ।
 अमावास्यायै स्वाहा कामाय स्वाहा गत्यै स्वाहा ।
 चन्द्रमसे स्वाहा । प्रतीदृश्यायै स्वाहा ।
 अहोरात्रेभ्यः स्वाहा । ऽर्धमासेभ्यः स्वाहा ।
 मासेभ्यः स्वाहर्तुभ्यः स्वाहा ।
 संवत्सराय स्वाहा ।
 अह्ने स्वाहा रात्रियै स्वाहा ।
 अतिमुक्त्यै स्वाहा ।

उ॒षसे॑ स्वाहा॒ व्युष्ट॑यै॒ स्वाहा॑ ।
 व्यु॒षुष्यै॑ स्वाहा॒ व्युच्छ॑न्त्यै॒ स्वाहा॑ ।
 व्यु॒ष्टायै॑ स्वाहा॑ ।
 नक्ष॑त्राय॒ स्वाहोदि॑ष्यते॒ स्वाहा॑ ।
 उ॒द्यते॑ स्वाहोदि॒ताय॑ स्वाहा॑ ।
 हर॑से॒ स्वाहा॒ भर॑से॒ स्वाहा॑ ।
 भ्राज॑से॒ स्वाहा॒ तेज॑से॒ स्वाहा॑ ।
 तप॑से॒ स्वाहा॒ ब्रह्म॑वर्च॒साय॑ स्वाहा॑ ।
 सूर्या॑य॒ स्वाहा॒ नक्ष॑त्रिभ्यः॒ स्वाहा॑ ।
 प्र॒ति॒ष्ठा॒यै॑ स्वाहा॑ ।
 आदि॑त्यै॒ स्वाहा॑ प्र॒ति॒ष्ठ॒यै॑ स्वाहा॑ ।
 विष्ण॑वे॒ स्वाहा॑ य॒ज्ञाय॑ स्वाहा॑ ।
 प्र॒ति॒ष्ठा॒यै॑ स्वाहा॑ ॥

दधि॑क्रावि॒ण्णो॑ अकारि॒षं जि॒ष्णोर॑श्च॒स्य वा॒जिनः॑ ।
 सूर॑भि नो॒ मुखा॑क॒रत् प्र॒ण आयू॑षि॒ तारि॑षत् ॥
 आपो॑हि॒ष्ठा म॑यो॒ भुव॑स्तान॒ ऊर्जे॑ दधातन । म॒हेर॑णाय॒ चक्ष॑से ॥
 योवः॑ शि॒वत॑मो॒ रस॑स्तस्य॒ भाज॑यते॒हनः॑ । उ॒शती॑रि॒व मा॒तरः॑ ॥
 तस्मा॑ अरं॒ गमा॑म॒ वो यस्य॑ क्षया॒य जि॒न्वथ॑ । आपो॑ ज॒नय॑था च नः ॥

उदु॑त्तमं वरु॒णपा॑शम॒स्मदवा॑धमं विम॒ध्यमः॑ श्र॒थाय॑ ।
 अथा॑ व॒यमा॑दित्य॒व्रते॑ तवाना॒गसो॑ अदि॒तये॑ स्याम ।
 अस्त॑भ्नाद् द्यामृ॒षभो॑ अ॒न्तरि॑क्षममि॒मीत॑ वरि॒माणं॑ पृथि॒व्या
 आसी॑दद्वि॒श्व्वा भुव॑नानि॒ सम्रा॑ड्वि॒श्वेत्त॑नि वरु॒णस्य॑ व्र॒तानि॑ ।
 यत्किञ्चे॑दम् वरु॒णदै॒व्यै जने॑ऽभिद्रो॒हं म॑नु॒ष्या॑श्च॒राम॑सि ।
 अचि॑त्ती॒यत्तव॑ धर्मा॑ यु॒योपि॑म मा न॒स्तस्मा॑देन॒सो दे॒व री॑रिषः ॥
 कित्वा॑सो यद्रि॒रिपु॑र्न दी॒वि यद्वा॑घा स॒त्यमु॑तयन्न वि॒द्य ।
 सर्वा॑ ता वि॒ष्य शि॒थिरे॑व॒ देव॑था॒ ते स्या॑म वरु॒णप्रि॑यासः ॥
 अ॒व ते॑ हे॒डो वरु॑ण॒ नमो॑भिर॒वय॑ज्ञेभि॒रीमहे॑ ह॒विर्भिः॑ ।
 क्षय॑न्न॒स्मभ्य॑मसुर॒प्रचे॑तो॒ राज॑न्नेना॒सि॒शिश्च॑थः कृ॒तानि॑ ॥
 तत्वा॑यामि ब्रह्म॒णा व॑न्द॒मान॑स्तदाशा॒स्ते यज॑मानो ह॒विर्भिः॑ ।
 अहे॑ड॒मानो॑ वरु॒णेह॑ बो॒ध्युरु॑शः॒ स मा न॑ आयुः प्रमो॒षीः ॥

हि॒र॒ण्यव॑र्णाः शुच॑यः पा॒वका॑ यासु॒ जातः॑ क॒श्यपो॑ यास्वि॒न्द्रः ।
 अ॒ग्निं या॑ गर्भ॑म् दधि॒रे वि॒रूपा॑स्तान् आ॒प॒शः॑ स्यो॒ना भ॑वन्तु ॥
 यासा॑ः राजा॒ वरु॑णो॒ याति॑ म॒ध्ये स॒त्यानृ॑ते अ॒वप॑श्य॒म् जना॑नाम् ॥

मधुश्चुतश्शुचयो याः पवित्रास्ता न आपृशशः स्योना भवन्तु ॥
 यासाम् देवा दिवि कृण्वन्ति भक्षं या अन्तरिक्षे बहुधा भवन्ति ।
 याः पृथिवीम् पयसोन्दन्ति शुक्रास्ता न आपृशशः स्योना भवन्तु ॥
 शिवेन मा चक्षुषा पश्यतापृशिवया तनुवोप स्पृशत त्वचम् मे ।
 सर्वाः अग्नीः रप्सुषदो हुवो वो मयि वर्चो बलमोजो निर्धत्त ॥

पवमानस्सुवर्जनः । पवित्रेण विचर्षणिः ।
 यः पोता स पुनातु मा । पुनन्तु मा देवजनाः ।
 पुनन्तु मनवो धिया । पुनन्तु विश्व आयवः ।
 जातवेदः पवित्रवत् । पवित्रेण पुनाहि मा ।
 शुक्रेण देवदीद्यत् । अग्ने क्रत्वा क्रतुं रनु ।
 यत्ते पवित्रमर्चिषि । अग्ने विततमन्तरा ।
 ब्रह्म तेन पुनीमहे । उभाभ्यां देवसवितः ।
 पवित्रेण सवेन च । इदं ब्रह्म पुनीमहे ।
 वैश्वदेवी पुनीती देव्यागात् । यस्यै बह्वीस्तनुवो वीतपृष्ताः ।
 तथा मदन्तः सधमाद्येषु । वयं स्याम पतयो रयीणाम् ।
 वैश्वानरो रश्मिभिर्मा पुनातु । वातः प्राणेनेषिरो मयो भूः ।
 ध्यावापृथिवी पयसा पयोभिः । ऋतावरी यज्ञिये मा पुनीताम् ।
 बृहद्भिः सवितस्तृभिः । वर्षिष्ठैर्देवमन्मभिः ।
 अग्ने दक्षैः पुनाहि मा । येन देवा अपुनत ।
 येनापो दिव्यकशः । तेन दिव्येन ब्रह्मणा ।
 इदं ब्रम्ह पुनीमहे । यः पावमानीरध्येति ।
 ऋषिभिस्सम्भृतं रसम् । सर्वं स पूतमश्नाति ।
 स्वदितम् मातरिश्चन । पावमानीर्यो अध्येति ।
 ऋषिभिस्सम्भृतं रसम् । तस्मै सरस्वती दुहे ।
 क्षीरं सर्पिर्मधूदकम् । पावमानीस्स्वस्त्ययनीः ।
 सुदुघाहि पयस्वतीः । ऋषिभिस्सम्भृतो रसः ।
 ब्राह्मणेष्वमृतं हितम् । पावमानीदिशन्तु नः ।
 इमं लोकमथो अमुम् । कामान्धसमर्धयन्तु नः ।
 देवीर्देवैः समाभृताः । पावमानीस्स्वस्त्ययनीः ।
 सुदुघाहि घृतश्चुतः । ऋषिभिस्सम्भृतो रसः ।
 ब्राह्मणेष्वमृतं हितम् । येन देवाः पवित्रेण ।
 आत्मानं पुनते सदा । तेन सहस्रधारेण ।
 पावमान्यः पुनन्तु मा । प्राजापत्यम् पवित्रम् ।
 शतोध्यामं हिरण्यमयम् । तेन ब्रह्म विदो वयम् ।
 पूतं ब्रह्म पुनीमहे । इन्द्रस्सुनीती सहमा पुनातु ।

सोमस्वस्त्या वरुणस्समीच्या । यमो रजा प्रमृणाभिः पुनातु मा ।
जातवेदा मोर्जयन्त्या पुनातु । भूर्भुवस्सुवः ।

तच्छं योरावृणीमहे । गातुं यज्ञाय ।
गातुं यज्ञपतये । देवीं स्वस्तिरस्तु नः ।
स्वस्तिर्मानुषेभ्यः । ऊर्ध्वं जिगातु भेषजम् ।
शन्नो अस्तु द्विपदे । शं चतुष्पदे ।
ॐ शान्तिश्शान्तिश्शान्तिः ।

नमो ब्रह्मणे नमो अस्त्वग्नये नमः पृथिव्यै नम ओषधीभ्यः ।
नमो वाचे नमो वाचस्पतये विष्णवे बृहते करोमि ॥
ॐ शान्तिश्शान्तिश्शान्तिः ।

॥ प्रोक्षण मन्त्राः ॥

आपोहिष्ठा मयो भुवस्तान ऊर्जे दधातन । महेरणाय चक्षसे ॥
योवः शिवतमो रसस्तस्य भाजयतेहनः । उशतीरिव मातरः ॥
तस्मा अरं गमाम वो यस्य क्षयाय जिन्वथ । आपो जनयथा च नः ॥

देवस्य त्वा सवितुः प्रसवे । अश्विनोर्बाहुभ्याम् । पूष्णो हस्ताभ्याम् ।
अश्विनोर्भेषज्येन । तेजसे ब्रह्मवर्चसायाभिषिञ्चामि ॥
देवस्य त्वा सवितुः प्रसवे । अश्विनोर्बाहुभ्याम् । पूष्णो हस्ताभ्याम् ।
सरस्वत्यै भेषज्येन । वीर्यायान्नाद्यायाभिषिञ्चामि ॥
देवस्य त्वा सवितुः प्रसवे । अश्विनोर्बाहुभ्याम् । पूष्णो हस्ताभ्याम् ।
इन्द्रस्येन्द्रियेण । श्रिये यशसे बलायाभिषिञ्चामि ॥

देवस्य त्वा सवितुः प्रसवे । अश्विनोर्बाहुभ्याम् । पूष्णो हस्ताभ्याम् ।
सरस्वत्यै वाचो यन्तुर्यन्त्रेणाग्नेस्त्वा साम्राज्येनभिषिञ्चामि ॥
देवस्य त्वा सवितुः प्रसवे । अश्विनोर्बाहुभ्याम् । पूष्णो हस्ताभ्याम् ।
सरस्वत्यै वाचो यन्तुर्यन्त्रेण बृहस्पतेस्त्वा साम्राज्येनभिषिञ्चामि ॥

द्रुपदादिव मुञ्चतु । द्रुपदादिवेन्मुमुचानः ।
स्विन्नः स्नात्वी मलादिव । पूतम् पवित्रेणवाज्यम् ।
आपश्शुन्धन्तु मैनसः ।

आपो वा इदं सर्वं विश्वा भूतान्यापः प्राणा वा आपः

प॒श॒व॒ आ॒पोऽ॒न्न॒मा॒पोऽ॒मृ॒त॒मा॒पः॑ स॒म्रा॒डा॒पो॑ वि॒रा॒डा॒पः॑
स्व॒रा॒डा॒प॒श्छ॒न्दा॑ऽस्यापो॒ ज्यो॒ती॑ऽष्यापो॒
य॒जू॑ऽष्याप॑ऽसत्य॒मा॒प॒स्स॒र्वा॑ दे॒वता॑ आ॒पो
भूर्भु॒व॒स्सु॒व॒रा॒प॒ ओ॒म् ॥

॥ उदकशान्ति ऋ मन्त्रपाठः समाप्तः ॥

Encoded with Accents by Rajagopal Iyer rajsand@yahoo.com
Send corrections to Rajagopal S. Iyer, rajsand@yahoo.com or to
sanskrit@cheerful.com

Please send corrections to sanskrit@cheerful.com
Last updated August 4, 2000